

摘藻堂四庫全書薈要

經部

欽定四庫全書會要

經部

欽定春秋傳說彙纂卷六

詳校官原任侍講臣王燕緒

欽定四庫全書蒼薈要卷一千七百九十七 經部

欽定春秋傳說彙纂卷六

庚桓王十一年 齊僖三十年 晉緡四年 衛宣十八年 蔡桓十四年 鄭莊四十三年 曹

辰九年 莊公射姑元年 陳厲六年 杞靖三年 莊九年 秦出子三年 楚武四十年

春正月齊人衛人鄭人盟于惡曹

惡曹杜注地闕

左傳 齊衛鄭宋盟于惡曹

胡傳 盟會皆君臣之禮故微者之盟會不志於春秋凡春秋所志必有君與貴大夫居其間者也惡

曹之盟即三國之君矣既不以道興師為郎之戰又結怨固黨為惡曹之盟故前書其爵而以來戰著罪

卷六

春正月

齊人

衛人

鄭人

盟于

惡曹

惡曹杜注地闕

二

欽定春秋傳說彙纂

卷六

後書此盟而
以奪爵示貶

集說

孫氏復曰謀魯也

孫氏覺曰去年之冬三國

新勝魯而結好耳謂之宋與盟於此九月必不執鄭祭仲與折之盟有夫鍾之會也左氏之說謬矣又曰前書齊人伐山戎後書齊侯來獻戎捷則知伐戎者齊侯也上書會楚公子嬰齊于蜀下書及楚人盟于蜀則知盟蜀者楚公子嬰齊也十二月書齊侯衛侯鄭伯戰郎正月書齊人衛人鄭人盟惡曹以比事之法求之則三國之貶稱人可知也陳氏傅良曰此郎之諸侯也曷為戰稱君盟稱人凡一役而再見者但人之略之也猶曰上無天子下無方伯莫適為主則人自為盟而已矣鄭敗王師齊滅后之母家而衛亦抗子突以自立其無王甚矣自有參盟莫甚於惡曹故略之也趙氏鵬飛曰惡曹之盟同絕魯也然

三國既伐魯何用復盟蓋齊鄭忿魯連衛以伐之而衛嘗期魯為桃丘之會雖因齊而不克徃齊鄭蓋疑衛復與魯也故盟之其後齊僖鄭莊衛宣皆不通於魯則斯盟為固矣然以私忿絕魯敵血要神其為盟誣矣雖固何益哉汪氏克寬曰鹿上之盟三國皆書人齊之盟清立同盟四國皆書人翟泉之盟七國皆書人蜀之盟十有一國皆書人澶淵之會十有二國皆書人未必皆微者苟皆微者則不書於經矣

湛氏若水曰春秋無善盟盟者忠信之薄况結黨謀魯同惡相濟逞其私忿而不知聲罪致討之義乎

案三國稱人以為微者固非矣或以為大夫亦無確據觀孫氏覺比事之法斷以經文則信乎為三國之君故獨

主胡傳

附錄左傳

楚屈瑕將盟貳軫鄖人軍於蒲騷將與隨絞州蓼伐楚師莫敖患之鬬廉曰鄖人軍

其郊必不誠且日虞四邑之至也君次於郊郟以禦
四邑我以銳師宵加於郟郟有虞心而恃其城莫有
闕志若敗郟師四邑必離莫敖曰盍請濟師於王對
曰師克在和不在衆商周之不敵君之所聞也成軍
以出又何濟焉莫敖曰卜之對曰卜以決疑不疑何
卜遂敗郟師於蒲騷卒盟而還鄭昭公之敗北戎
也齊人將妻之昭公辭祭仲曰必取之君多
內寵子無大援將不立三公子皆君也弗從

貳杜注國名今在隨州應山縣境軫杜注國名
今在德安府應城縣西鄭杜注郟國江夏雲杜

縣東南有郟城水經注澗水經安陸故城古郟城
也今為安陸縣屬湖廣德安府蒲騷杜注郟邑

今在湖廣德安府應城縣北三十里絞杜注國
名在今鄖陽府西北州杜注州國在南郡華容

縣東南今湖廣荊州府監利縣東三十里有州陵
城蓼杜注蓼國義陽棘陽縣東南湖陽城今在

河南南陽府唐縣南八十里 郊郢杜注楚地今湖廣安陸府治郢州故城是其地也

夏五月癸未鄭伯寤生卒

左傳

夏鄭莊公卒初祭封人仲足有寵於莊公莊公使為卿為公娶鄧曼生昭公故祭仲立之

祭杜注鄭地陳留長垣縣東北有祭城今屬直隸大名府

胡傳

鄭莊公志殺其弟使餽其口於四方自以為保國之計得也然身沒未幾而世嫡出奔庶孽奪

正公子五爭兵革不息忽儀疊突之際其禍慝矣亂之初生也起於一念之不善後世則而象之至於兄弟相殘國內大亂民人思保其室家而不得不亦酷乎有國者所以必循天理而不可以私欲滅之也莊公之事可以為永鑒矣

集說俞氏皋曰莊公娶鄧曼生世子忽是為昭公又納宋雍氏女名雍姑生子突是為厲公又生子

疊子儀昭公立四月而出奔厲公自宗入而立焉後厲公出奔國人弑昭公而立子疊齊侯殺子疊祭仲

又立子儀

秋七月葬鄭莊公

集說

杜氏預曰三月而葬速高氏閔曰鄭忽既立不待五月而葬其父是生亂階季氏本曰卒

踰兩月而葬速也太不懷也其故何也必慮有爭焉耳蓋嗣君為喪主諸侯會葬其位始定庶孽不敢爭矣故凡速葬者皆有故也

九月宋人執鄭祭仲

此書執之始

左傳 宋雍氏女於鄭莊公曰雍姑生厲公雍氏宗有寵於宋莊公故誘祭仲而執之曰不立突將死

亦執厲公而求賂焉祭仲與

宋人盟以厲公歸而立之

公羊

祭仲者何鄭相也

穀梁

宋人者宋公也其曰人何也貶之也

胡傳

祭仲鄭相也見執於宋使出其君而立不正罪較然矣何以不名命大夫也命大夫而稱字非

賢之也乃尊王命貴正鄉大祭仲之罪以深責之也其意若曰以天子命大夫為諸侯相而執其政柄事權重矣固將下底其身而上使其君保安富尊榮之位也今乃至於見執廢絀其君而立其非所立者不亦甚乎任之重者責之深祭仲無所逃其罪矣

集說

何氏休曰宋不稱公者脅鄭之篡首惡當誅非伯討也 劉氏敞曰何為或稱人以執或稱侯

以執稱侯以執者伯討也稱人以執者非伯討也又曰公羊以謂知權非也若祭仲知權者宜效死勿聽

使宋人知雖殺祭仲猶不得鄭國乃可矣且祭仲謂宋誠能以力殺鄭忽而滅鄭國乎則必不待執祭仲而劫之矣如力不能而夸為大言何故聽之且祭仲死焉足矣何故黜正而立不正以為行權乎 蘇氏

轍曰書曰宋人執鄭祭仲而繼之以突之入與忽之出仲以出君易死罪之也公羊曰祭仲何以不名賢

其知權也夫以出君為知權亂之道也 陳氏傅良

曰祭仲以命大夫專廢置君曷為從其恒稱而不名

春秋之褒貶名號不足以盡意則見於辭書曰宋人執鄭祭仲突歸于鄭鄭忽出奔衛其為辭也詳矣則

從其恒稱不名可也 家氏鉉翁曰宋非方伯連帥

鄭之執政非其臣屬受其執而不怒蓋共為盜姦外

雖執而中則同也春秋先書宋人執鄭祭仲繼書突入忽出著仲為首惡也 王氏元杰曰鄭忽以世嫡

而嗣位突歸以庶孽而亂倫嫡既弱而無能庶則強而有援宋莊私愛而黨突祭仲被執以要盟仲既受付託於先公不能守死以輔君反忍奪嫡以立庶春秋稱人貶宋者惡其暴以正專執之誅書祭仲者貴命卿以大祭仲之罪突不書氏明其不能有國書忽繫鄭示其正而不君輕重權衡見矣 李氏庶曰經

書他國執他國大夫九祭仲鄭詹陳濤塗衛甯喜宋仲幾皆稱人以執不稱行人鄭良霄衛石買宋樂祁

衛北宮結皆稱人以執不稱行人事各不同執而殺者二齊慶封陳干徵師也執內大夫四齊執單伯晉執行父意如媯也 金氏賢曰祭仲鄭相也宋執之欲其廢正立邪以亂人國宋莊之不道甚矣春秋去其爵所以惡宋也祭仲見執惟知偷生之為安而不知死難之為義遂從亂以忘君其為不道亦甚矣春

秋去其官所
以惡仲也

突歸于鄭

左傳

秋九月丁亥昭公
奔衛己亥厲公立

公羊

突何以名挈
乎祭仲也

穀梁

曰突賤之也曰歸易辭也祭仲易其事權在祭
仲也死君難臣道也今立惡而黜正惡祭仲也

胡傳

突不稱公子絕之也小白入于齊則曰齊小白
突歸于鄭何以不稱鄭突乎以小白繫之齊者

明桓公之宜有齊也不以突繫之鄭者正厲公不當
立也突不當立何以書歸于鄭乎春秋書歸有二義
一易辭也一順辭也其書入亦有二義一難辭也一
逆辭也突以庶奪正固為不順矣然內則權臣許之

立外則大國為之援而世子忽之才不能以自固也則其歸無難故穀梁子曰歸易辭也

集說

孔氏穎達曰成十八年傳例曰諸侯納之曰歸知此為宋所納故曰歸也 劉氏敞曰此鄭突

也曷為不繫之鄭貶曷為貶鄭非突之所可號歸非突之所可名歸非突之所可名則其曰突歸于鄭何病祭仲也祭仲之為人臣也處則不能守出則不能權貪生而好勢廢正以立亂曰突歸于鄭者見突之挈乎祭仲者也歸者順辭也有易辭焉非所順而書歸易也入者逆辭也有難辭焉非所逆而書入難也突之易見祭仲之挈也交惡之又曰公羊曰其言歸何順祭仲也非也若仲之為者春秋之亂臣也如何順之乎 程子曰突不稱公子不可以有國也 陳氏傅良曰凡歸皆譏也莫甚於突故弗繫之鄭歸未有不繫國者突莊公子也而弗繫之鄭以為是篡鄭也 家氏鉉翁曰鄭有君而突自外歸篡也削其公

子不繫之鄭所以討也祭仲執而突歸突由仲而入也
俞氏皋曰突不言鄭突不當有鄭也稱鄭忽言忽當有鄭也與書糾齊小白赤曹羈之義同李氏
庶曰經以篡而書歸者二此年突莊二十四年赤執而歸者二僖三十年衛侯鄭成十六年曹伯也大國
得封而書歸者二昭十三年蔡侯廬陳侯吳也書歸例惟穀梁得之公羊失於祭仲知權之說故以書歸為順祭仲之辭不可取汪氏克寬曰公羊謂歸者出入無惡入者出入惡復歸者出惡歸無惡復入者出無惡入有惡然突歸鄭赤歸曹不可謂無惡許叔入許天王入成周不可謂出入惡鄭忽曹襄出無惡魚石欒盈出入有惡則其說不可通矣李氏本曰宋人執祭仲突歸于鄭則突自宋歸可知文省而義自備矣

鄭忽出奔衛

此書奔之始

公羊

忽何以名春秋伯子男一也辭無所貶

穀梁

鄭忽者世子忽也其名失國也

胡傳

忽以國氏正也出奔而名不能君也

集說

何氏休曰既葬稱子合伯子男為一辭無所貶皆從子忽稱子則與諸侯改伯從子辭同於成

君無所貶損故名也

陸氏淳曰不稱子者責其不能嗣先君耳 劉氏敞曰此鄭子也何以名貶曷為

貶忽不子也忽不子者何遠君子近小人不能與賢者圖事權臣擅命放乎五世亂鄭者忽失為子之道

也 蘇氏轍曰鄭忽未踰年之君也未踰年之君稱子不稱子何也不能君也國人不附大國不援以至

於出奔蓋未嘗君也故不曰子 程子曰忽以國氏正也不能有其位故不爵 葉氏夢得曰何以不書

爵未踰年也未踰年則何以不稱子不周乎喪也何以名別二君也一年不可以二君故未踰年之君未葬皆不以爵見內稱子其子般子野卒外稱子宋襄公以宋子會于葵丘陳懷公以陳子會于召陵是也未踰年雖既葬內亦稱子不名子赤卒稱子卒外亦稱子衛成公以衛子會盟于洮是也曠年不可以無君故踰年之君既葬稱爵鄭厲公以鄭伯會武父是也雖未葬亦稱爵衛惠公以衛侯會諸侯及魯戰宋共公以宋公會諸侯伐鄭是也未踰年而有事於諸侯不周乎喪而用言禮則稱爵以見貶齊頃公以齊侯使國佐來聘鄭悼公以鄭伯伐許邾隱公以邾子盟于拔是也未踰年見迫逐不周乎喪而出奔則奪其子以見貶鄭忽出奔衛是也踰年見迫逐不周乎喪而出奔則奪其爵以見貶曹羈出奔陳莒展輿出奔吳是也陳氏傅良曰鄭忽何不能為子也身為冢嗣而廢立自權臣不可以言子矣是故書奔始於

此李氏庶曰經書君奔而名者三鄭忽曹羈莒展
輿也趙氏曰忽羈不書爵言不能嗣先君也展輿雖
踰年猶不書爵其罪大也又曰突篡位四年而出奔
昭公以桓十五年入國其秋突因櫟人殺檀伯而入
櫟據強都以窺鄭諸侯會于袤又會于曹以納之而
弗克然突固分國以居矣十七年高渠彌弒昭公而
立公子亶十八年齊人殺子亶祭仲逆子儀於陳而
立之莊十四年突自櫟侵鄭傳瑕殺子儀及其二子
而納焉於是鄭國之禍稍息四
公子之事多不見經故具於此

柔會宋公陳侯蔡叔盟于折

折杜注地闕

公羊

柔者何吾大夫之未命者也

集說

杜氏預曰柔魯大夫未賜族者孔氏穎達曰以柔不稱族與無駭相類是無族可稱知其未

賜族也 孫氏復曰柔不氏內大夫之未命者蔡叔
蔡侯弟也案諸侯母弟未命為大夫者皆字此年柔
會宋公陳侯蔡叔盟于折十五年許叔入於許十七
年蔡季自陳歸於蔡莊三年紀季以鄆入於齊之類
是也 葉氏夢得曰凡諸侯兄弟尊之則稱公子故
大夫三命以氏見公子之尊視大夫亦三命而後氏
也親之則稱兄弟故或奔亡而責以恩或盟聘而譏
以私則稱兄弟也其不以公子兄弟見者惟許叔紀
季蔡季與此而四耳 陳氏傅良曰柔者何以大夫
會諸侯盟於是始也故貶之至公子結不貶矣 呂
氏大圭曰以大夫與諸侯盟此不待貶絕而自見者
也故內大夫帥師自無駭始內大夫與諸侯盟自柔
始 李氏廉曰案陸氏例諸侯兄弟以國連字者有
蔡叔許叔蔡季紀季皆國而字之言與君一體也是
以蔡叔為蔡侯之弟矣而穀梁杜氏皆以為蔡大夫
未命故名而不氏此未可知恐陸氏是又曰經書內

大夫盟外諸侯九始於此季氏本曰宋莊弒立本倚鄭莊然得國以來為鄭所抑諸侯會盟不得與焉其積忿久矣故鄭莊卒即抉突以亂鄭將謂突立必助已也而鄭之羣臣猶足拒宋突為衆議所迫即絕宋交宋莊不得志於鄭故合三國以為盟將為圖鄭之計矣是盟也宋為主魯使大夫往既而五會桓公欲堅魯之志也蓋鄭齊為黨宋得魯則齊兵不敢擬其後而宋可專意向鄭耳此折之盟所以為宋公志與

公會宋公于夫鍾

鍾公作童東兗州府寧陽縣盛鄉城春秋邾國

夫鍾杜注邾地今在山

其北有夫鍾里

冬十有二月公會宋公于闕

闕杜注魯地東平須昌縣東南今山東兗州府汶上

縣西有關亭
在南旺湖中

胡傳

臣與宋公盟于折君與宋公會于夫鍾于闕于
虛于龜皆存而不削何其辭費也曰盟者春秋

所惡而屢盟以長亂會者諸侯所不得而數會以厚
疑聖人皆存而不削於以見屢盟而卒叛數會而卒
離其事可謂著明矣是故春秋之志在於
天下為公講信修睦不以會盟為可恃也

集說

高氏閔曰公憾鄭忽而欲定突是以不憚屈辱
力為鄭請宋亦數與公會皆非為國為民其罪

均耳

家氏鉉翁曰二年之間兩盟四會惟宋之故

春秋書盟會未有若是頻數者也

季氏本曰宋欲

結魯讎鄭也必桓公懷疑故堅其志耳

卓氏爾康

曰宋魯皆助突者折以下三盟皆宋莊結魯爭鄭之
計屢盟而厚疑胡氏之言是也是時鄭黨於齊宋非
制齊難以圖鄭而魯方有戰郎之怨於齊陳蔡亦有

積怨深恨於鄭故折之會宋欲得魯為應以防齊之議其後也

張氏溥曰惡曹之盟齊衛鄭為郎之戰

謀魯而固黨也宋亦與焉經不書左云闕也及觀柔盟于折公會于夫鍾于闕魯君臣於宋獨親然則惡曹之盟宋果不與未可知也參盟莫甚於惡曹屢盟莫甚於魯宋盟並無善焉

辛桓王二年

十有二年

齊僖三十一年晉緡五年衛宣十年蔡桓十五年鄭厲公突元年

曹莊二年陳厲七年杞靖四年宋莊十年秦出子四年楚武四十一年

春正月

集說

黃氏震曰書春正月以存四時之始

夏六月壬寅公會杞侯莒子盟于曲池

杞公穀作紀曲池公作毆蛇

曲池杜注魯地魯國汶陽縣北有曲水亭
今在曲阜縣東北四十里源出石門山

集說

程子曰杞侯皆當作紀隱二年紀莒盟于密是時紀謀齊難故魯桓與之盟莒以援之耳家

氏鉉翁曰公穀以杞為紀是也隱公二年盟于密左氏注莒魯有怨紀侯既昏於魯使大夫盟莒以和解之紀莒以魯故而為盟有自來矣吳氏澂曰紀為齊難危急甚矣魯桓切切為紀謀故屢會焉而大國無與同心者此會也僅能與小弱之莒偕其不能為助而無救於紀之亡也蓋可知矣俞氏皋曰書會而紀先序紀為主也湛氏若水曰紀謀齊亂不能自達於天子為魯桓者當為之請於天子明下禁令各守封疆而齊不服從王命則當告於天子會於連帥而伐之何為會之紛紛而無益於救紀也故春秋

書之以著其非

秋七月丁亥公會宋公燕人盟于穀丘

穀丘杜注宋地今在山東兗州

府曹州北

三十里

左傳

公欲平宋鄭秋公及宋公盟于句瀆之丘

句瀆之丘杜注即穀丘也漢濟陰郡有句陽縣應劭曰即句瀆之丘今其地名句陽店

集說

杜氏預曰燕人南燕大夫孫氏覺曰入春秋來燕未嘗見於經惟此與十三年始見而稱燕

人昭三年書北燕伯欵出奔齊言北燕則亦有南燕也北燕限於山戎自莊二十八年齊桓伐山戎之後始為燕開路得通中國是於此穀丘之盟北燕猶為山戎所隔杜預解之曰南燕大夫是也趙氏鵬飛

曰南燕也黃帝之後入春秋蓋未與諸侯通於此首與宋魯盟宋魯之盟為鄭謀也宋不義而魯不信兩

無可從者至十三年乃遂從宋與魯鄭戰小國兵力有限而從不義之役兵敗之後不復見於經不知為何國所滅 吳氏澂曰左氏以為魯欲平宋鄭然此盟必是魯宋燕三國別有他事相要約非為鄭賂之事盟也 因是盟與宋公相見而為鄭致請焉耳 黃氏正憲曰去年宋與魯陳蔡為盟今又與燕盟將以斷齊鄭之道也 左氏乃云公欲平宋鄭何也 蓋是時齊鄭為黨齊謀吞紀桓公欲援之而不可得其欲平鄭於宋者意欲圖鄭背齊合魯而陰援紀也 計亦巧矣

八月壬辰陳侯躍卒

集說 杜氏預曰厲公也十一年與魯大夫盟于折不書 葬魯不會也 壬辰七月二十三日書於八月

從赴 孔氏穎達曰躍為厲公世本文也 莊二十二年傳曰陳厲公蔡出也故蔡人殺五父而立之五父

即佗六年殺佗而厲公立也陳世家以佗與五父為二人言蔡人為佗殺五父及桓公大子免而立佗是為厲公立七年大子免之三弟躍林杼白共弑厲公而躍立是為利公利公立五月卒林立是為莊公案傳五父佗一人而世家以為二人案經蔡人殺佗在桓公卒之明年不得為佗立七年也佗以六年見殺躍以此年始卒不得為躍立五月也既以佗為厲公又妄稱躍為利公世本本無利公皆是馬遷妄說也壬辰是七月二十三日上有七月書於八月之下如此類者注皆謂之日誤今云從赴者以其終不可通蓋欲兩解故也張氏洽曰去年與柔盟于折不書葬魯不會不恤同盟也家氏鉉翁曰左傳謂蔡人殺陳佗而立厲公厲公即躍公羊何氏以躍為佗子故削其墓疑佗子未必為君

公會宋公子虛

虛去魚反公作邾虛杜注宋地疑在睢州境

冬十有一月公會宋公于龜

龜杜注宋地
疑在睢州境

左傳

宋成未可知也故又
會于虛冬又會于龜

集說

高氏開曰公委宗社人民而五出與宋會諸侯
臨涖一國之民民不可一日不治則國不可一

日去之故先王之法諸侯無故不得出其四境朝事
天子則出境天子巡狩則出境方伯率諸侯以征伐
則出境若無事而出境則誅葉氏夢得曰公始以
柔會宋未幾復自會于夫鍾于闕于穀立夫鍾郕地
闕魯地穀立宋地也及是復會于虛于龜皆宋地而
公即之蓋自隱公以來我之相與為厚薄者惟宋與
鄭黨鄭則伐宋善宋則伐鄭孰有立國如是而可久
者乎暴戾則無親失道則寡援君子是以知桓公之
不終也汪氏克寬曰桓公屢至宋地強宋公之從
而不己固為屈辱然二盟四會皆以會宋為詞則是

宋公有志於會盟矣。蓋宋之所以會魯者，將以求賂於鄭而魯之所以會宋者，將以為鄭免其賂。是以卒不能降心以相從也。魯桓憾忽于郎之戰，幸鄭莊之卒欲求好於厲公，而以恩結之。厲公篡忽，特欲反忽之所為而求善於魯，以為之援耳。黃氏正憲曰：案折闕夫鍾之會，是宋欲親魯伐鄭，故數會於魯地。宋為主也。此龜虛之會，是魯欲平宋，鄭為主也。此龜虛之會，是魯欲平宋，鄭為主也。

案自折以下，魯與宋四會，二盟有以為魯志者，左氏所謂欲平宋鄭也。有以為宋志者，穀梁所謂會者外為志也。二說不同，惟黃氏正憲謂始則宋欲親魯，繼則魯欲為宋平鄭，引宋魯地名以為證。於情事為近。

丙戌公會鄭伯盟于武父

武父，杜注鄭地。陳留濟陽縣東北有武父城。水經注濟陽

縣故武父城也。今在直隸大名府東明縣西南，與河南開封府蘭陽縣接界。

左傳

宋公辭平故與鄭伯盟于武父

集說

蘇氏轍曰鄭伯突也突篡其兄而立春秋以君許之何也諸侯雖以篡得苟能和其民而親諸

侯內外君之則以君書之不沒其實也雖君而實篡雖篡而實君皆因其實而已不然則否不能君也衛

州吁陳佗是也

許氏翰曰王迹既熄霸統未興諸

侯自擅無所稟命觀隱十年見兵革之亂也桓十一

年十二年見盟會之亂也霸統興而諸侯有所一無

復此亂矣是以君子不得已而與桓文張氏洽曰

與人交之道忠信誠慤本乎中則有不期合而合者

其人非有是心則其相與也不過以利合而一旦爭

小利則相視忽如讐敵然桓公之見棄於宋而盟鄭

其離合正如是春秋詳書之以見王政不行諸侯放

恣魯桓榮莊鄭厲皆以篡國而立交相盟會紛紛離

合惟利是視煩盟瀆信祇以長亂王法之所必誅也

呂氏大圭曰突篡而書爵者諸侯雖以篡得國苟其大臣君之其國人君之諸侯亦與之會盟春秋從而君之從其實也 趙氏鵬飛曰自突之入鄭四會兩盟皆為鄭謀而已使宋鄭可平一盟足矣何以多為今屢盟數會而宋不肯平可以已矣乃寒前日之盟背前日之會盟鄭突而謀伐焉故詳書會宋一書會鄭以著允之惡 家氏鉉翁曰與齊衛伐魯戰于郎者忽也突篡忽者也故善於魯自是魯鄭遂合 程氏端學曰魯桓與宋兩盟四會不決旬而背之以盟鄭反覆如是比事而觀其義自見 季氏本曰鄭伯即突也此盟鄭求於魯也魯與宋合而宋無魯規則鄭受其害矣然鄭非許以棄齊則魯亦必不背宋魯與鄭合而鄭亦援紀矣 桓公為紀之心此亦可見

丙戌衛侯晉卒

集說

孔氏穎達曰春秋之中惟此重書日其餘亦應有一日兩事各書日名但更無其日不可復知

計赴告之體本應皆以日告史官書策復應各書其

日仲尼書經不以日月褒貶或畧或詳非此所急故

日月詳畧皆依舊文此重書丙戌以舊史所重故因

史成文爾孫氏復曰再言丙戌羨文也此盟與卒

同日爾且經未有一日而再書者此羨文可知劉

氏敞曰曷為再日春秋故史也有所不草子曰其事

則齊桓晉文其文則史其義則丘竊取之矣孫氏

覺曰丙戌之日再見於經者誤文耳穀梁以為決日

義也案春秋不以日月為例有書之者但因舊史而

詳畧之耳穀梁謂之決日非也黃氏震曰再書丙

戌國史成文也鄭夾漈曰丙戌一日也不應再書丙

戌非後申則前子邵氏寶曰日同而地異故兩書

焉即書者紀事之職

追書者承赴之體也

十有二月及鄭師伐宋丁未戰于宋

左傳

遂帥師而伐宋戰焉宋無信也君子曰苟信不繼盟無益也詩云君子屢盟亂是用長無信也

公羊

此偏戰也何以不言師敗績內不言戰言戰乃敗矣

穀梁

於伐與戰敗也內諱敗舉其可道者也

胡傳

既書伐宋又書戰于宋者責賂於鄭而無厭屢盟於魯而無信者宋也二國聲其罪以致討故

書曰伐夫宋人之罪則固可伐矣然取其賂以立替者魯桓也資其力以篡國者鄭突也無諸已然後可以非諸人春秋之義用賢治不肖不以亂易亂也故又書曰戰于宋來戰者罪在彼戰于郎是也往戰者罪在內戰于宋是也

集說 啖氏助曰穀梁曰不言與鄭戰耻不和也。不知

省文之義故云爾。

孫氏復曰此公及鄭伯伐

宋也不言公者諱之也。地以宋則宋與戰可知也。不

出主名者不與公及鄭伯伐宋也。故以魯鄭自戰為

文。凡公專尸其事則諱之。此年及鄭師伐宋。丁未戰

于宋十七年及齊師戰于奚莊九年及齊師戰于乾

時之類是也。劉氏敞曰孰及之公也。戰者曷為或

言公或不言公戰而勝則言公言敗戰而不勝則不

言公不言敗戰而敵則言公而不言敗。高氏閔曰

內没公而稱及鄭不爵而稱師鈞其罪也。陳氏傅

良曰此公及鄭伯也。曷為前稱君後稱師畧之也。戰

不言伐有不與戰則言伐如僖十八年宋曹衛邾伐

齊而宋及齊戰是也。未始有不與戰者而亦曰伐則

甚伐者也。曰戰于宋薄宋之罪也。張氏洽曰爭恨

小故不忍憤怒謂之憤。兵兵憤者敗。魯桓鄭突此役

是也。趙氏與權曰魯軌弑隱宋馮弑殤鄭突篡忽

三者皆逆賊周有常刑皆戮餘也故稱兵為戰見王
法之不行也黃氏震曰戰于宋者魯鄭深入伐之

而宋應之故戰耳齊氏履謙曰戰伐不書主帥者

凡九桓二年入杞八年伐邾十年齊衛鄭來戰于郎

此年及鄭伐宋十七年及齊師戰于奚及宋人衛人

伐邾莊九年及齊師戰于乾時僖四年及江人黃人

伐陳二十二年及邾人戰于升陘以上九事內省文

者三以國與之者三闕文者三先書十有一月丙戌

公會鄭伯盟于武父次書十有二月及鄭師伐宋先

書夏公伐齊納糾次書八月庚申及齊師戰于乾時

先書春正月公會諸侯伐楚次書秋及江人黃人伐

陳皆一出而再有事其不書主帥者省文也戰于郎

于奚于升陘郎奚升陘皆魯地或經以來戰為文或

傳以疆事為解其不書主帥者國與之也桓二年入

杞八年伐邾十七年再伐邾其不書主帥者闕文也

吳氏澂曰宋莊貪得鄭賂之多而不許魯桓之請

鄭突遂忘宋立已之恩與魯結黨為伐戰之舉魯桓棄屢會屢盟之好乃與舊怨之鄭興兵以讐宋交道

之翻覆不常在匹夫猶不可況國君乎

汪氏克寬

曰桓平宋鄭不從而至於伐戰宣平郊莒不肯而至

於伐取皆不能反已而求其本也

李氏廉曰宋莊

之立以魯齊陳鄭之皆有賂故也今責賂於鄭是以

已之前日望鄭也春秋書部鼎之取以見宋魯鄭之

交以賂合書武父之戰以見宋魯鄭之黨以賂離吁

嚴矣哉

趙氏汾曰春秋內外恒異辭伐者為客受

伐者為主由外言之也苟吾君在焉則不得從外辭

案宋之戰左傳以為宋無信蓋宋馮賁賂無厭魯鄭

可以聲罪而致討也然魯允鄭突皆篡弑之賊王法

所當誅何得稱兵以擅伐人國乎胡氏安國

曰往戰者罪在內也二說相兼其義始備

附錄左傳

楚伐絞軍其南門莫敖屈瑕曰絞小而輕輕則寡謀請無扞采樵者以誘之從之絞

人獲三十人明日絞人爭出驅楚役徒於山中楚人坐其北門而覆諸山下大敗之為城下之盟而還伐絞之役楚師分涉於彭羅人欲伐之使伯嘉謀之三巡數之

彭杜注彭水在新城昌魏縣後漢志房陵有筑水即彭水也故昌魏縣在今湖廣鄖陽府房縣西南

羅杜注熊姓國在宜城縣西山中後徙南郡枝江縣今湖廣襄陽府宜城縣西二十里羅川城乃

羅故國其在岳州府平江縣南三十里之羅城與長沙府湘陰縣接界者是後徙處也楚遷之枝江

後漢志枝江侯國本羅國是也又自枝江徙長沙今岳州府平江縣南三十里有羅城長沙府湘陰

縣東六十里亦有羅城乃接境處也

壬桓王二十有三年齊僖三十二年晉緡六年衛惠公
午十一年朔元年蔡桓十六年鄭厲二年曹

莊三年陳莊公林元年杞靖五年宋莊
十一年秦出子五年楚武四十二年

春

附錄左傳

春楚屈瑕伐羅鬬伯比送之還謂其御曰
莫敖必敗舉趾高心不固矣遂見楚子曰

必濟師楚子辭焉入告夫人鄧曼鄧曼曰大夫其非
衆之謂其謂君撫小民以信訓諸司以德而威莫敖
以刑也莫敖狃於蒲騷之役將自用也必小羅君若
不鎮撫其不設備乎夫固謂君訓衆而好鎮撫之召
諸司而勸之以令德見莫敖而告諸天之不假易也
不然夫豈不知楚師之盡行也楚子使賴人追之不
及莫敖使徇於師曰諫者有刑及駟亂次以濟遂無
次且不設備及羅羅與廬戎兩軍之大敗之莫敖縊
於荒谷羣帥囚於冶父以聽
刑楚子曰狐之罪也皆免之

賴後漢志襄信侯國有賴亭故賴國文獻通考賴國在襄信縣元省縣為鎮今在息縣東北其賴亭則在商城縣南息縣商城皆屬汝寧府光州蓋地相接也杜注在義陽隨縣則去光州甚遠不知何據 鄢杜注鄢水在襄陽宜城縣入漢孔穎達曰鄢水出新城沔鄉縣今湖廣襄陽府宜城縣南有宜城故城即古鄢國也 盧戎杜注南蠻即今中廬故城在湖廣襄陽府南漳縣東五十里 荒谷杜注楚地荆州記州東三里有三湖湖東有水名荒谷今在湖廣荆州府 治父杜注楚地水經注荒谷東岸有治父城今治父城在荆州府東

二月公會紀鄭伯己巳及齊侯宋公衛侯燕人戰齊

師宋師衛師燕師敗績

穀梁

其言及者由內及之也其曰戰者由外言之也戰稱人敗稱師重衆也其不地於紀也

胡傳

左氏以為鄭與宋戰公羊以為宋與魯戰穀梁以為紀與齊戰趙匡考據經文內兵則以紀為

主而先於鄭外兵則以齊為主而先於宋獨取穀梁之說蓋齊紀者世讎也齊人合三國以攻紀魯鄭援紀而與戰戰而不地於紀也不然紀懼滅亡不暇何敢將兵越國助魯鄭以增怨乎齊為無道恃強凌弱此以紀為主何也彼為無道加兵於己必有引咎責躬之事禮儀辨喻之文猶不得免焉則亦固其封疆效死以守上訴諸天子下告諸方伯連率與鄰國之諸侯其必有伸之者矣不如是而憤然與戰豈已亂之道乎力同度德動則相時小國讐大國而幸勝焉禍之始也息伐鄭而亡鄭勝蔡而懼蔡大敗楚而滅今紀人不度德不量力不徵詞輕與齊戰而為之援者弑君之賊篡國之人也不能保其國自此戰始矣

春秋以紀為主省德
相時自治之意也

集說

杜氏預曰或稱人或稱師史異辭也衛宣公未葬惠公稱侯以接鄰國非禮也孔氏穎達曰

戰稱將敗稱師是史策之常法也師是將之所帥故戰則稱將敗則稱師言其衆師盡敗非獨將身敗也

趙氏匡曰左云宋責賂于鄭責賂小事止當二國自不和無容諸侯為戰也公羊曰曷為後日恃外也

案先會而後日成會而後戰也恃外有何義乎又曰凡諸侯在喪而有境外之事以喪行者稱子以吉行者稱爵志惡之淺深也劉氏敞曰左氏曰宋多責

賂於鄭鄭不堪命故以紀魯及齊與宋戰不書所戰

後也非也若宋鄭相怨鄭為此戰者鄭當序紀上宋當序齊上何故反顛倒之乎公雖不及其會期而及

其戰期自當沒會地而舉戰地今何故反沒戰地乎又曰鄭人來修好案魯鄭同好未嘗有隙何故忽修

之是見明年會于曹因說此耳公羊云何以不地近也然則郎之戰非為近也明矣而曰郎猶可以不地不亦誣乎又曰其言戰從外也非也戰者聖王所有何故諱乎其意以為敗則言戰言戰則敗也今實不敗不可言戰故云從外矣不知凡書戰而不言敗績者乃諱敗耳書戰而言敗績者敗者他國也必言戰而後見其敗何得不言又何以為從外乎蘇氏轍曰先言會而後言日既會而後戰會戰異日也孫氏覺曰春秋戰必書地此不書地者戰於紀也紀為齊之侵削志欲滅之舉宋衛燕三國之師往伐之紀於是要魯鄭之君以為之敵然經不書所戰之地者以紀侯主兵而與之戰則是其戰在紀也呂氏大圭曰紀以垂亡之國而獲戰勝之功此可喜也齊以大國之威而蓄必報之怨甚可懼也桓公之所以為紀謀者既無以為固紀之道而徒挾鄭以戰幸而勝齊必將謂可固紀矣而不知所以促紀之亡者在此

役也迨夫紀懼亡不給然後為黃之盟求以安紀亦晚矣陳氏深曰春秋首書公會公及罪之也四國

之師衆若可勝也而皆敗績見衆之不可恃也

吳

氏徵曰昔鄭莊助齊謀紀者也魯桓數為鄭會宋繼

又同鄭伐宋鄭厲德魯故助魯救紀而反其父之所

為李氏廉曰經書內外之戰二十三書敗績十五

書戰例左氏曰皆陳曰戰胡氏曰兩兵相接曰戰書

及例胡氏曰戰而言及主乎是戰者也趙氏曰戰而

言及以主及客也戰不言及交為主也書敗績例左

氏曰大崩曰敗績何氏曰績功也諸說皆通李氏

本曰齊鄭本一黨也及武父之盟鄭魯合則宋燕黨

於齊衛矣齊欲滅紀魯援之故桓公與紀鄭合以與

齊戰日在會後見其以會定日志在我也王氏譙

曰紀逼於齊鄭突以責賂而怨宋魯主紀因怨忽而

助突此一兵也齊謀紀忽嘗有功於齊故齊主之宋

以賂怨突而忽奔衛故衛主之此一兵也志各有在

相糾合為此戰非一紀能主兵也

案是戰也三傳互異趙氏匡獨取穀梁而胡氏安國孫氏覺吳氏澂皆因之其說是也鄭康成謂紀當為已范氏甯引之以駁穀梁則鑿矣

三月葬衛宣公

胡傳 葬自內錄也既與衛人戰曷為葬宣公怨不棄義怒不廢禮是知古人以葬為重也禮喪在殯孤無外事衛宣未葬朔乃即戎已為失禮又不稱子是以吉服從金革之事其為惡大矣凡此類據事直書年月具存而惡自見也

集說 劉氏敞曰君子怨不棄義怒不廢禮惡不忘親陳氏傅良曰凡君在喪恒稱子衛宣公未葬

則其稱衛侯何不以居喪之禮出也 家氏鉉翁曰

衛宣公未葬而嗣子朔從諸侯及魯紀鄭戰敗績而

歸乃葬其親甚矣衛朔之不仁也春秋不書衛子而

以爵書絕之於名教也衛宣行同犬彘教之行於家

者可知是不足深責而春秋垂法後世不容無責也

吳氏澂曰二月己巳之戰齊紀為敵怨衛助齊滅

紀魯為紀禦齊魯衛非敵怨也故不廢會葬之禮

汪氏克寬曰春秋在喪而出預會盟征伐及遣使鄰

國者有十此年衛惠會戰紀僖九年宋襄會葵丘二

十五年衛成會洮二十八年陳共會溫三十三年晉

襄敗秦師于穀宣十年齊頃使國佐聘成三年宋共

衛定伐鄭四年鄭悼伐許定四年陳懷會台陵侵楚

是也然宋襄衛成陳共懷皆稱子則見其未易吉服

其罪猶可未減此年衛惠稱爵會戰則以吉服從戎

其罪益甚矣然戰紀非朔主兵故直書而惡自見晉

襄敗秦則忘親背惠墨衰經而以詐取勝視朔尤甚

故不稱爵而以微者紀之宋共衛定未葬而已越葬期齊頃鄭悼雖已葬而未踰年但直書而罪惡著矣

夏大水

集說

高氏閔曰自堯有洪水之患使禹治之禹疆理天下正其經界有畎有澮有溝有洫有川有遂

遂無水患但有其利故年之豐凶一係農力水旱不能為之害或天時久雨則由畎注澮由澮注溝由溝注洫由洫入川由川入遂以次疏導入河入江終至於海蓋以決而不為災也或天時久旱則於溝洫川遂之間遞引其水以為灌溉又得其利焉春秋之時暴君汙吏壞其經界使畎澮溝洫之屬皆蕪而不治於是遇大水而無以決遇大旱而無以溉民為兵戰所驅無暇治田畝聖人書大水者上痛禹跡之亡下悼井田之廢生民受其患無以拯濟之也 王氏葆曰經書水災者九而桓居其二莊居其三是大水之

災二公居三之二矣豈桓公積惡不悛莊公釋讐不復怨氣蘊結有以致之歟張氏洽曰陰盛之災
湛氏若水曰紀異也水陰之象也惡之象也小人
之象也臣下之象也妻妾之象也人君可以省矣

秋七月

冬十月

集說黃氏震曰
書備四時

癸桓王二年十有四年齊僖三十三年晉緡七年衛惠二
未十二年年蔡桓十七年鄭厲三年曹莊四

年陳莊二年杞靖六年宋莊十二
年秦出子六年楚武四十二年

春正月公會鄭伯于曹

左傳

春會于曹曹人致餼禮也

集說

杜氏預曰以曹地曹與會 高氏閔曰公與鄭伯皆有篡逆之大惡天下所不容今相會于曹

曹之容惡可知也

張氏洽曰厲公比年與公連兵

戰伐修怨故來求好

趙氏鵬飛曰突之立雖以宋

而宋既憾之所與者魯而已一日失魯突其能固哉故求於魯為專前年之戰實受魯賜而敗宋師德魯益深故今春會公而夏又來聘蓋同惡相濟舍魯無可求援者也 王氏葆曰公於鄭突比之至矣十二

年屢會以平宋鄭而不克則為武父之盟為宋之伐十三年偕紀侯之戰今又會于曹同惡相濟明矣

吳氏澂曰前年魯鄭同救紀而敗齊衛之師蓋虞齊衛之報怨也故為會以謀之曹素與魯協故會鄭於

其地 季氏本曰九年射姑來朝曹與魯協者也曹在衛南東址為齊界亦同齊衛之往來也

無冰

公羊

何以書
記異也

穀梁

時燠
也

胡傳

案幽風七月周公陳王業之詩也其辭曰二之日鑿冰沖沖三之日納于凌陰四之日其蚤獻

羔祭非周官凌人之職頒冰於夏其藏之也固陰沍寒於是乎取其出之也賓食喪祭於是乎用藏之周用之徧亦理陰陽天地之一事也今在仲冬之月燠而無冰則政治縱弛不明之所致也故書於策夫春秋所載者皆經邦大訓而書法若此其察於四時寒暑之變詳矣

集說

何氏休曰周之正月夏之十一月法當堅冰無冰者温也 范氏甯曰皆君不明去就政治舒

緩之所致五行傳曰視之不明是謂不哲厥咎舒厥
罰常燠 葉氏夢得曰水以孟冬始冰仲冬壯季冬
盛二之日鑿冰沖沖壯也凡書以時者志春書以月
者志正月二月春包三月也時不志冬始冰則或未
冰也春不志三月以解凍則不冰也 張氏洽曰固
陰返寒之時而不冰陰不能成物之災 呂氏大圭
曰古者藏冰發冰所以節陰陽之盛也十二月陽氣
蘊伏銅而未發其盛在下則納冰於地中至二月四
陽作蟄蟲起陽始用事則亦始啓冰而廟薦之及四
月陽氣畢達陰氣將絕則冰於是大發食肉之祿老
病喪浴冰無不及是以四時無愆陽伏陰淒風苦雨
故夫藏冰發冰者變調之一事也春秋之書無冰不
獨志常燠之異而亦以見備暑之無其備也或謂開
冰而書無冰豈有建寅之月遽開冰乎春秋所書蝻
蝻李梅實隕霜之類皆據目前之災異而志之豈必
待開冰而後書無乎或者又援大無麥禾之例謂歲

終會計而後書大無麥禾猶開冰而後書無冰也不
知大無麥禾與書大有年為一類謂歲終會計而後
知也開冰之事亦可與會於歲終者比乎 家氏鉉
翁曰春秋書無冰者凡三皆在春月以冰政不舉而
書也 俞氏皋曰此亦見是周月紀事若夏正月則
東風解凍宜無冰也必周正月夏之十一月也當冰
而不冰冬溫也然冰亦國所有用之物無則國用不
給是以書之 汪氏克寬曰此年正月書無冰成元
年二月書無冰襄二十八年書春無冰則知因陽盛
氣燠而隨時以紀之苟以發冰而知無冰則當常以
二月而不在正月矣若曰或藏冰無冰而書無或發
冰無冰而書無抑何紀事之錯亂乎 劉氏實曰凡
不宜無曰無 陳氏宗之曰天官占云燠而無冰則
政治縱弛不明之所致也又劉向曰周失之舒秦失
之急故周衰無寒
歲秦滅無燠年

夏五

公羊

夏五者何
無聞焉爾

穀梁

孔子曰聽遠音者聞其疾而不聞其舒望遠者察其貌而不察其形立乎定哀以指隱桓隱桓

之日遠矣夏

五傳疑也

胡傳

夏五傳疑也疑而不益見聖人之慎也故其自言曰吾猶及史之闕文也其語人曰多聞闕疑

慎言其餘則寡尤而世或以私意改易古書者有矣蓋亦視此為鑒可也然則春秋何以謂之作曰其義則斷自聖心或筆或削明聖人之大用其事則因舊史有可損而不能益也

集說

杜氏預曰不書月闕文啖氏助曰夏五之下必知脫月字孫氏復曰孔子作春秋專其筆

削損之益之以成大中之法豈其日月舊史之有闕者不隨而刊正之哉此云夏五無月者後人傳之脫漏爾 劉氏敞曰何以不益疑也春秋信以傳信疑以傳疑 家氏鉉翁曰此修經以後之闕文若舊史有闕聖人必修之矣 邵氏賢簡曰夏五何傳疑也是簡闕何可疑者因其無疑而傳之示萬世傳疑之法也况真有疑者乎

案夏五或以為闕月字或以五為羨文或以為聖人因史闕文或以為後人傳寫脫漏皆傳疑之意也

鄭伯使其弟語來盟

語穀作禦

左傳

鄭子人來尋盟且脩曹之會

穀梁

諸侯之尊弟兄不得以屬通其弟云者以其來我舉其貴者也來盟前定也

胡傳

來盟稱使則前定之盟也其不稱使如楚屈完齊高子則權在二子盟不盟特未定也諸侯之

兄弟例以字通而書名者罪其有寵愛之私非友于之義也

集說

孫氏復曰來盟者求盟於我也蘇氏轍曰凡外大夫來盟於魯內大夫蒞盟於他國皆盟其

君也大夫而盟其君禮乎禮諸侯不親盟於他國大夫即盟於他國非敵君也雖盟其君可也孫氏覺

曰春秋諸侯使其弟來者皆罪其不當使也弟而可使則命而使之可也不命而使之徒曰弟焉罪之也

來盟者盟於魯也春秋主我使自外而至盟者書曰來盟不言其地盟於我之國都也程子曰使來盟

盟前定矣與高子不同高氏閔曰來盟於我彼欲之之辭也蒞盟於彼我欲之之辭也鄭魯同惡而屢盟

可惡之甚也趙氏鵬飛曰突之立於鄭內恃祭仲而已國人不欲也外恃魯而已鄰國不與也春秋書

來盟者凡六皆屈已而求盟於我也鄭非無大夫而必使其弟則知諸大夫有所不心乎突也趙氏與

權曰請會矣又請盟焉突蓋德軌之排宋而黨已也

李氏庶曰來盟例五鄭語衛良夫稱使者前定之

盟也謂已有約言未足效信而釋疑復遣使固結之也楚屈完齊高子不稱使者權在二子謂齊楚二君遣使之時未常有命令盟也宋華孫不稱使者華孫權臣專行不受君命也屈完非來魯亦書來者內桓師也又曰語後為子人氏鄭昭公之禍以羣弟之多寵也今厲公奪嫡又復私愛子人使交政諸侯何不鑑覆轍乎觀甯母之役鄭子華言於齊桓曰洩氏孔氏子人氏實違君命君若去之以為成則子人氏之專權於鄭可知矣汪氏克寬曰大夫因聘而盟則先書聘而後書及盟非聘而特來結盟則但書來盟然皆所以著大夫之敵君也

案穀梁謂前定之盟不日非也春秋不以日月為例二百四十二年之間盟不書日者多矣前定不日豈書日者皆非前定乎來盟有書使者有不書使者鄭語衛良夫奉使而來意主於盟以為前定可也齊高子楚屈完宋華孫皆臨事制宜安得以為前定乎故凡以不日為前定者皆不錄而來盟不書使者俱刪前定之說

秋八月壬申御廩災

公羊

御廩者何梁盛委之所藏也御廩災何以書記災也

胡傳

門觀災而新作則書御廩梁盛之所藏其新必矣何以不書營宮室以宗廟為先重本也御廩

災而新則不書常事也以為常事而不書垂教之意深矣知其說者然後知有國之急務為政之後先雖

勤於工築而民不怨勞與安興
土木困民力以自奉者異矣

集說

杜氏預曰

御廩公所親耕以奉粢盛之倉也天
火曰災 孔氏穎達曰傳稱御廩災乙亥嘗書

不害也明嘗之所用是御廩之所藏也禮記祭義云
天子為籍千畝諸侯百畝躬秉耒以事天地山川社
稷先古敬之至也月令季秋乃命冢宰藏帝籍之收
於神倉鄭康成云重粢盛之委也帝籍所耕千畝也
藏祭祀之穀故為神倉以此諸文知御廩藏公所親
耕以奉粢盛之倉也廩即倉之別名周禮廩人為倉
人之長其職曰大祭祀則其其接盛鄭康成云接讀
為扱扱以授春人大祭祀之穀籍田之既藏於神倉
者不以給小用是公所親耕之粟擬共祭祀藏於倉
廩故謂之御廩 劉氏敞曰御廩者何粢盛委積之
所藏也災者火也其謂之災何也猶曰天戒之鬼神
害之云爾 高氏閔曰御廩災此將不得奉其宗廟

之祥也君躬耕夫人獻種桂以供粢盛而災焉咎在君夫人矣宗廟鬼神之怒兆見於此吳氏澂曰君之在車與御者最相親近故君所親近之人謂之御君所親用之物亦謂之御御廩者以貯人君躬耕藉田之米專供宗廟之粢盛而不敢他用者李氏庶曰經書內災六御廩西宮新宮雉門兩觀桓僖宮亳社也外災六齊一成周一宗二陳一宋衛陳鄭同日一也汪氏克寬曰御廩西宮新宮亳社譏不能戒謹而致災也雉門兩觀桓宮僖宮譏其非禮而宜災也

乙亥嘗

公羊 常事不書此何以書譏何譏爾譏嘗也
曰猶嘗乎御廩災不如勿嘗而已矣

穀梁

御廩之災不志此其志何也以為唯未易災之餘而嘗可也志不敬也天子親耕以供粢盛王

后親蠶以共祭服國非無良農工女也以為人之所
盡事其祖禰不若以己所自親者也何用見其未易
災之餘而嘗也曰甸粟而內之三官三官米而藏之
御廩夫嘗必有兼甸之事焉壬申御廩災乙亥嘗以
為未易災之
餘而嘗也

胡傳

嘗祭時事之常則何以書志不時與不敬也春
秋紀事用周月而以八月嘗則不時也御廩災

於壬申而嘗以乙亥是不改卜而供未易災之餘則
不敬也禮以時為大施於事則不時禮以敬為本發
於心則不
敬故書

集說

杜氏預曰先其時亦過也 孔氏穎達曰八月
建未未是始殺 趙氏匡曰穀梁云御廩之災

不志案此乃大故何得不志左氏曰書不害也案八
月嘗非時也又以災之餘而祭譏不敬也非為不害

而書 葉氏夢得曰不書月蒙上文 張氏洽曰四時之祭常事耳今書者以壬申有御廩災之變遇災而懼未可以遽有事於祖考况祭祀用夏時此八月乃夏之六月未當時祭何為汲汲然以四日之間遽舉嘗祭乎其無誠敬之心而所以供粢盛者苟簡滅裂概可見矣春秋特書以責其奉宗廟之不誠且不敬也 趙氏鵬飛曰災與嘗自二事爾災以著天變嘗以著不時 趙氏與權曰御廩之災在致齋三日之前春秋書之蓋以嘗之不謹而災於齋之日也 李氏廡曰三傳惟穀梁得之而夫人無甸之說亦非公羊以為不如勿嘗而注者以為宜廢祭自責謬矣 左注尤失實苟不害何必書乎故胡氏不時不改卜之說主趙氏 汪氏克寬曰郊禘諸侯之所不當祭故孔子云魯之郊禘非禮也嘗社諸侯之常祭故春秋一書嘗譏以災餘之米供粢盛四書社皆以日食大水鼓用牲之非禮而志之不書祭社以為常事也

漢儒見中庸以郊社禘嘗並言又見春秋書禘郊社禘嘗故傳會以為皆借禮然春秋書烝書嘗豈以嘗獨為重祭而烝非重祭乎嘗而謂之大春秋何以不書大乎

案公羊不如勿嘗乃甚言其嘗之不敬豈真以嘗為可廢乎趙氏注劉氏敵蘇氏轍並駁之恐非公羊立言之旨也穀梁所謂未易災之餘者以御廩所藏為奉祭時既舂之未故曰甸粟而納之三宮三宮米而藏之御廩劉氏權衡駁之云壬申之日災乙亥之日嘗嘗之粟出廩久矣乃其未災者何謂災之餘乎此則以御廩所藏為未舂之粟也考周禮廩人之職曰大祭祀則共其接盛鄭康成云扱以授舂人是御廩所藏固未舂也權衡之說似較穀梁為勝然遇災後不改卜而遽嘗則無誠敬之心故不時不敬二義先用之

冬十有二月丁巳齊侯祿父卒

宋人以齊人蔡人衛人陳人伐鄭

公蔡人在衛人下

左傳

冬宋人以諸侯伐鄭報宗之戰也焚渠門入及大遠伐東郊取牛首以大宮之椽歸為盧門之

椽

牛首杜注鄭邑今河南開封府陳留縣西南十一里有牛首城

公羊

以者何行其意也

穀梁

以者不以者也民者君之本也使人以其死非正也

胡傳

師而曰以者能左右之以行已意也宋怨鄭突之背已故以四國伐鄭魯怨齊人之侵已故以

楚師伐齊蔡怨囊瓦之拘已故以吳子伐楚蔡弱於吳魯弱於楚宗與蔡衛陳敵而弱於齊乃用其師以行己意故特書曰以列國之兵有制皆統乎天子而敢私用之與私為之用以伐人國大亂之道也故穀梁子曰以者不以者也

集說

杜氏預曰凡師能左右之曰以大宮鄭祖廟盧門宋城門告伐而不告入取故不書 范氏寘

曰不以者謂本非所得制今得之以也刺四國使宋專用其師輕民命也 孫氏復曰案十二年及鄭師

伐宋丁未戰于宋宋人怨突之背已也故以齊人蔡人衛人陳人代鄭以者乞師而用之也謂四國本不

出師宋以力弱不足以乞四國之師而伐鄭爾僖二十六年公以楚師伐齊取穀定四年蔡侯以吳子及楚人戰于柏舉皆此義也然四國從宋伐鄭助其不道其惡亦可見矣 劉氏敞曰以者何行其意也貴

則行乎賤大則行乎小衆則行乎寡此皆微者也其言以何宋公也宋公則其稱人何貶曷為貶君之伐國者不斬祀不殺厲不堙井正之而已矣宋公伐鄭殘其郊牧焚其城郭隳其大宮取其椽以歸為盧門之椽是暴而已矣又曰書宋人以齊人則足以知宋人者宋公也書晉人及姜戎則足以知晉人者晉侯也文不虛出必有其指椽於文以求其指則得之矣宋公殘人之國而毀其宗廟晉侯背父之殯而覆人之師其罪一也王氏沿曰入而書伐鄭亦有罪致其伐耳葉氏夢得曰伐何以言以已不能敵而假人以為用也德不足服於人而人以人義不可服於人而為人所以是謂以私濟私皆失政也四國何以皆稱人微者也時齊侯卒矣而未葬齊非君則三國亦非君也宋公何以稱人貶也殘人之宗廟以大宮之椽為盧門之椽君子以為與吳入郢者何擇故吳子與國宋公稱人其罪一也高氏閔曰折之盟陳蔡

在焉紀之戰齊衛在焉皆與宋同惡者也宋公不道
執人之卿易人之君深怨突之背己而自量其力不
足以加之於是復以齊蔡衛陳之兵伐鄭宋公之罪
斯為尤重 胡氏寧曰齊桓晉文戰勝天下威服諸
侯固能左右諸國之師非以弱假強故不言以 陳
氏傅良曰伐未有言以者則其言以何用諸侯之師
於是始也東遷之後諸侯雖會伐非一國之志也非
一國之志也則會者序爵而已矣雖主兵也而小國
序大國之上亦非一國之志也以一國而用諸侯之
師於是始 呂氏大圭曰齊方有喪而會伐惡之甚
者矣 趙氏鵬飛曰宋於鄭初以為親終以為讐為
利也齊蔡衛陳輕民之命而為他人役是以聖人惡
之一舉而書人君臣同一貶焉其法蓋嚴矣 家氏
鉉翁曰書以有貶者有褒者此貶也春秋坐宋以兵
首責宋亦責四國也四國以其民為宋人役賊其民
者也定四年蔡昭侯以吳師伐楚為其復世讐推強

楚故許之以之一字不可以例觀 陳氏深曰宋用四國之師而左右死生唯宋人之為聽比於平日諸侯各率其師以伐人者又不同故書以別之 程氏端學曰宋莊之罪著矣然鄭突忘立己之恩結魯以伐宋以致交怨報復殺戮無辜突真薄德哉 汪氏克寬曰或謂言以者用彼師伐戰而已不交鋒蓋泥於左傳記柏舉事皆吳楚自戰故云爾蓋蔡師微弱故不詳錄也夫苟不自交鋒則非能左右之謂矣况傳稱宋以大宮椽歸為盧門椽經書魯取穀則非不交鋒之驗也 季氏本曰蔡陳與宋盟折者也衛與齊盟惡曹者也今合為一黨宋莊公當鄭莊公存日畏不敢為及鄭莊卒遂與鄭讎至是齊僖又卒遂侈然雄長而能以四國之兵矣伐鄭所以報厲公連年之怨也

甲桓王二
申十三年

十有五年

齊襄諸兒元年晉緡八年衛惠三年蔡桓十八年鄭厲四年曹莊五

年陳莊三年杞靖七年宋莊十三年秦武公元年楚武四十四年

春二月天王使家父來求車

左傳

非禮也諸侯不貢車服天子不私求財

公羊

何以書譏何譏爾王者無求求車非禮也

穀梁

古者諸侯時獻於天子以其國之所有故有辭讓而無徵求求車非禮也求金甚矣

胡傳

遣使需索之謂求王畿千里租稅所入足以充費不至於有求四方諸侯各有職貢不至於來

求以喪事而求貨財已為不可况車服乎
經於求賻求車求金皆書曰求垂後戒也

集說

何氏休曰王者千里畿內租稅足以供費四方各以其職來貢足以尊榮當以至庶無為率先

天下不當求求則諸侯貪大夫鄙士庶盜竊孫氏復曰天王使冢父來求車者諸侯貢賦不入周室材用不足也劉氏絢曰世之治也天子命貢賦於天下而無敢不從無有求也諸侯奉貢賦於天子而無敢不共不至於來求也世亂反此書此以見王室之微而著諸侯之辜也葉氏夢得曰古者車有器貢用有貨貢諸侯不貢而伐之正也不能伐之又從而求焉器不足而求車用不足而求金非所以王天下也張氏洽曰古者諸侯有功則車服以庸蓋王之五路自同姓以下其用之皆有差等非諸侯所得而私為况可以天子之尊而下求於列國乎上越禮以求之下違法而供之則示貪風於天下其失自上非小故也故特書示譏冢父為大夫無所正救奉使侯國自取辱命之罪具見矣冢氏鉉翁曰以天王之尊而徵需猥及於不稟命之侯始而求賻繼而求車繼而求金以求書者見成周號令不行於當時而遜

詞以有求深責諸侯之無王也。吳氏澂曰：車重器也。天子可以之，錫下諸侯不可以之，貢上也。使當貢之物，諸侯不供而天子乏用，猶不當遣使以私求。況諸侯不當貢之物而可求乎哉？趙氏恒曰：左氏言諸侯不貢車服而周官却有服貢，先儒謂周禮後出，雖左氏亦未之知也。然此不須問其當貢與否，雖當貢者不至亦不當求。如賻豈非諸侯所宜歸，然不歸豈可求也？胡氏謂以喪事求貨財已為不可，況車服乎？當時諸侯雖不臣，恐職貢亦未必不至。不然則包茅不入，齊桓安得假之以伐楚乎？大抵此求車是為桓王喪具，乃在服貢之外。張氏溥曰：武氏子來求賻，不稱使當喪，未君非王命也。家父稱使則王命矣。天子五路不出，列國諸侯九貢不供，王車求之何為？至文公九年，頃王使毛伯求金，世彌降則求彌下。

哉悲

三月乙未天王崩

集說

何氏休曰桓王也

趙氏匡曰此後莊王僖王

不書崩見王室不告魯之不赴著諸侯之不臣也
俞氏皋曰周桓王崩太子佗立是為莊王趙氏
曰周嗣王即位皆不書不能令於天下也諸侯之不
臣而莫之臣也哀王道積微而莫之興也趙
氏汭曰七年而後克葬則諸侯不王之罪大矣

夏四月己巳葬齊僖公

集說

王氏葆曰桓負大惡王非惟不討而八年之間
三遣使來聘恩禮厚矣今王崩來赴魯無奔喪

會葬之事齊僖之存干戈歲尋卒則會葬如禮比事
以觀不貶而惡自見高氏閏曰魯不供天王之喪
而會齊僖之葬其顛倒甚矣

五月鄭伯突出奔蔡

左傳

祭仲專鄭伯患之使其婿雍糾殺之將享諸郊雍姬知之謂其母曰父與夫孰親其母曰人盡

夫也父一而已何可比也遂告祭仲曰雍氏舍其室而將享子於郊吾惑之以告祭仲殺雍糾尸諸周氏之汪公載以出曰謀及婦人宜其死也夏厲公出奔蔡

公羊

突何以名
奪正也

穀梁

譏奪
正也

胡傳

案左氏祭仲專鄭伯患之使其婿雍糾殺之雍姬知之以告仲仲殺雍糾公出奔蔡是祭仲逐

之也沒而不書其義何也陸淳曰逐君之臣其罪易知也君而見逐其惡甚矣聖人之教在乎端本清源

故凡諸侯之奔皆不書所逐之臣而以自奔為名所以警乎人君其說是也

集說

杜氏預曰突既篡立權不足以自固又不能倚任祭仲反與小臣造盜賊之計故以自奔為文

罪之也

孔氏穎達曰凡諸侯出奔皆被逐而出非

自出也舊史書臣以逐君仲尼修春秋責其不能自

固皆以自奔為文衛獻公出奔不名鄭伯突及北燕

伯欵蔡侯朱等皆書名者從彼告詞故釋例曰衛赴

不以名而燕赴以名隨赴而書之孫氏復曰突屬

公也篡忽立國人不與故出奔蔡凡諸侯不能嗣守

先業以隳厥緒荒怠淫虐結怨於民上下乖離播越

失地自取奔亡之禍者皆生而名之此年鄭伯突出

奔蔡昭二十一年蔡侯朱出奔楚二十三年莒子庚

輿來奔哀十年邾子益來奔之類是也劉氏敞曰

突何以名奔而名者見有君也忽未入則其曰有君

何忽雖未入國固其國也蘇氏轍曰諸侯不生名

突之名失地也突將殺祭仲不克而出諸侯之出奔必有出之者矣言其出不言其出之者何也君實有國而出於臣臣雖有罪而君至於失國自取之也程子曰避祭仲而出非國人出之也陳氏傅良曰

春秋之法苟其道足以失國雖有權臣亦以自致之文書之是故鄭祭仲殺雍糾而突出衛孫林父殺子蟜子伯子皮而衍出燕大夫殺外嬖而款出書奔而已矣張氏洽曰凡為國君而失位出奔者春秋皆

以自出書之其書爵不名者罪輕惡淺雖曰失道而其位為未絕若突以庶孽奪嫡固不可以有國又為反覆盜賊之計以自取亡蓋王法之所當誅故特書其名以絕之也陳氏深曰突既欲殺祭仲而不克故畏而出奔稱鄭伯著其已篡立而鄭之臣子嘗君之也汪氏克寬曰春秋書君出奔者十有二鄭突

衛朔燕款蔡朱莒庚與邾益皆書名啖氏所謂君奔例書名言其失地非復諸侯也鄭忽曹羈莒展與不

稱爵者忽羈未成君展輿雖踰年而以弒立不可稱爵也衛鄭不名則以叔武攝而位未絕也衛衍位已絕而不名者著衍之立以正非突朔之比而剽之篡實逆非如忽黔牟可以兩君言之也郝朱儒不名小

國記錄

簡略耳

案逐突者祭仲也不書仲逐其君而書鄭突出奔者春秋誅討亂賊嚴君臣之大分不使賊臣得以逞志於其君故以自奔為文也胡傳本陸氏淳謂所以警乎人君豈逐君者其罪尚可貸乎於義頗有未安然相沿已久今仍存之鄭突書名或以為絕之或以為從赴二說俱通

鄭世子忽復歸于鄭

左傳

六月乙亥
昭公入

公羊 其稱世子何復正也

穀梁 反正也

胡傳 忽嘗嗣位君其國歸而獨稱世子則亡其君位明矣其稱復歸者謂既絕而復歸也然諸侯失

國出奔歸而稱復則可大夫失位出奔歸而稱復則不可古者諸侯世國大夫不世官或曰復厭詞也

集說 杜氏預曰忽實居君位故今還以復其位之例為文也 陸氏淳曰復歸之正者莫過於鄭忽

孫氏復曰鄉曰鄭忽出奔衛今曰鄭世子忽復歸于鄭者明忽世嫡當嗣也 劉氏敞曰公羊以謂復

歸者出惡歸無惡歸者出入無惡非也如忽之奔蓋有不得已亦何惡乎若以為惡猶有可諉未知突之

篡國亦何故出入無惡乎 蘇氏轍曰忽嘗為君矣其出也稱鄭忽其復歸也稱鄭世子忽何也於其出

言其不能君也於其復歸言其所恃以反國者惟世子也舍是無足以歸者矣突既出則忽之歸無難矣

孫氏覺曰春秋之法易者曰歸難者曰入復其位曰復歸復其惡曰復入鄭突因祭仲之援逐世子忽出奔而復歸焉盖易也故書曰突歸於鄭忽嘗有鄭伯之位突見逐而出奔忽歸無難而位又復也故書曰鄭世子忽復歸于鄭齊小白外有糾之爭立內無大臣之為援遽以兵歸而奪國焉歸之難也故書曰齊小白入于齊宋魚石既奔於楚藉楚而入于彭城明年宋嘗會數國之師而圍之出奔嘗有惡矣入又據其邑以叛復其惡而不悛也故曰宋魚石復入于彭城春秋以一字定其難易之迹故有書歸復歸書入復入四者之異然其事之善惡迹之順逆則皆隨其所書而可見矣

程子曰稱世子本當立者不能保其位故不稱爵

陳氏傳良曰忽嘗不稱世子此其加世子何從其恒稱也以其失國也不稱子以其

歸國也稱世子春秋無加損焉正其名實而已矣
趙氏與權曰突忽之出入惟祭仲之為聽權臣擅國
命而廢置其君舉國之人莫之違祭仲之事不可以
訓也 李氏庶曰諸侯失國復歸者四鄭忽衛侯鄭
曹伯襄衛侯圻是也 汪氏克寬曰前失書突歸而
繼書忽奔者以忽之出由突之入也此先書突奔而
繼書忽歸者明忽之歸由突之出也忽與突之強弱
見矣突之歸不繫國而忽稱世子嫡庶之名分辨矣

許叔入于許

穀梁 許叔許之貴者也莫宜乎許叔其
曰入何也其歸之道非所以歸也

胡傳 許太岳之裔先王建國迫於齊鄭不得奉其社
稷未聞可滅之罪也則當伸大義以直詞上告

諸天王下赴諸方伯求復其國糞除宗廟孰能與之
爭今乃因亂竊入則非復國之義故書入于許入云

者難
詞也

集說

杜氏預曰許焄莊公弟也隱十一年鄭使許大夫奉許焄居許東偏鄭莊公既卒乃入居位許

人嘉之以字告也

范氏甯曰許國之貴莫過許焄

叔之宜立又無與二而進無王命退非父授故不書

歸孔氏穎達曰入者自外之詞本其所自之處言

其自許東偏而入于許國非從外國入也鄭莊公以

十一年卒許焄今始入者蓋鄭突不使其復忽既得

位親仁善鄰存許以德許人冀其為己之援故此年

始得入也小白陽生入皆稱名此焄稱字故云許人

嘉之以字告也陸氏淳曰啖氏云言入志非其正

也字之善興復也此言取國者皆有傾奪惟許焄有

克復之功無傷義之責故可善也劉氏敞曰許焄

者何許公子也何以字賢也何賢爾宜為君也宜為

君則其稱入何難也何難焉爾鄭幾滅之迨其亂而

後能入也 孫氏覺曰許嘗為鄭所有於此之時鄭有爭國之亂許對得乘其勢入許而復其國聖人美之特書其字曰許叔不書其爵者未嘗有爵也不曰歸者有鄭之難不可以安而歸也紀季以鄆入齊則書季許叔入許則書叔皆賢之也紀季能全其祀許叔能復其國皆諸侯之弟而其兄奔亡存祀復國之善同故其賢一也陸淳論之曰入繼之美者莫過於季興復之善者莫過於許此說是也 蘇氏轍曰叔之不稱公子將為君也不名而字無與爭國者也凡將君而非爭者皆字許叔蔡季是也 葉氏夢得曰叔字也許叔何以得字賢之也鄭莊公入許許對復之君子以是為賢也何以不言許男得國而未君也蔡侯廬陳侯吳得稱爵王命復之則君也許對未受命可以復許未可以君許必君命而後得爵也何以言入難也國已分矣乘人之亂而幸得焉其復之道為難也 陳氏傅良曰凡入皆譏也則其曰許對何

以是為宜入也入未有書字者雖公子也弗謂公子
此其曰許牀所以別有罪也叔不書字則疑於齊小
白陽生莒去疾張氏洽曰諸侯進以正乃可以正
邦國因亂竊入己之不正無以正乎人故書入以見
義有所不受家氏鉉翁曰許叔之入入之善者也
衛朔之入鄭突之入入之惡者也鄭氏玉曰入有
二義一曰逆辭一曰難辭以經文觀之既係之國復
著其字則入非有所貶乃所以見其難耳李氏庶
曰諸侯入國例七許叔宜復國而不得其道故書字
書入齊小白陽生莒去疾可以有國而無君父之命
故雖以國氏不書公子而書入鄭突衛朔亂倫失正
已失國而又復春秋以其逆也故書爵書名書入獨
衛獻入夷儀春秋俟其改過也故書爵書入而不名
胡氏於許叔小白去疾皆曰難詞則陽生衛獻亦可
入此例於衛朔曰逆詞則鄭突亦可入此例公羊注
以為許牀本小國春秋前失爵在字例凡入者出入

皆惡明當誅是盖不知入許之本末而妄為此說

案許射有興復之美故書字乘人之亂無王命而復國故書入或以為不必俟王命而疑胡傳為迂非春秋尊王之義也

公會齊侯于艾

艾公作鄆穀作蒿

集說

孫氏覺曰艾之盟左氏以為謀定許也案若二國實謀定許當見其定許之迹經無其事此亦

未可知也

高氏閔曰魯嘗與齊絕矣自僖公卒襄公新立至是復通好焉

鄭氏玉曰隱十一年入許

之役齊魯鄭也今許射乘鄭之亂以復其國齊魯不與師以問之則已矣安得反為之會以立其位乎高氏謂魯嘗與齊絕至是復通好彭生之禍兆於此矣故春秋志之以齊侯為主理或然也

案會艾之後魯再伐鄭而齊不與焉安見其為謀定
許耶孫氏覺鄭氏玉所以駁左氏也高氏問以為魯
與齊復通好揆之當日情事似
為近之故定許之說皆不錄

邾人牟人葛人來朝

牟杜注牟國泰山牟縣今山東濟南府東二十里有牟城葛杜注

梁國寧陵縣東北今河南歸德府寧陵縣有葛城在
汴河之南僖十七年傳齊桓公夫人葛嬴則葛國嬴
姓

集說董氏仲舒曰為天王崩而相朝故貶孔氏穎
達曰三國俱稱人合行禮知其尊卑同也孫

氏復曰皆微國之君劉氏敞曰滕薛之旅見也與
邾牟葛無異滕薛之貶輕而邾牟葛之貶重何也曰

古之諸侯朝者固曰間於天子之事考禮正刑一德
以尊天子焉耳滕薛是也今天王崩魯與三國未嘗

奔問弔贈修臣子之職而方沛然以朝禮自處其義
上僭是所以責之重也杜氏諤曰三國班見所以

人之也杜元凱以為附庸世子安有三國同時遣世
子耶陳氏傅良曰旅見非邦交之舊自參以上甚

矣凡朝不勝譏莫甚於自參以上故貶人之
氏震曰旅朝諸侯事天子之禮魯不當受旅朝黃

秋九月鄭伯突入于櫟

櫟杜注鄭別都也河南陽
翟縣今開封府禹州是也

左傳鄭伯因櫟人殺
檀伯而遂居櫟

公羊櫟者何鄭之邑也曷為不言入於鄭末言爾曷
為末言爾祭仲亡矣然則曷為不言忽之出奔

言忽為君之微也祭仲存
則存矣祭仲亡則亡矣

胡傳經於厲公復國削而不書獨書入于櫟何也夫
制邑之死豨君共城之叛太叔皆莊公所親戒

也今又城櫟而寘子元馬使昭公不立何謀國之誤也衛有蒲戚而出獻公楚有陳蔡不羹而叛棄疾末大必折有國之害也故夫子行乎季孫曰古者家不歲甲邑無百雉之城遂墮三都以張公室於厲公復國削而不書者若曰既入于櫟則其國已復矣於以明居重馭輕強幹弱枝以身使臂之義為天下與來世之鑒也為國者可不謹于禮乎

集說

孫氏復曰鄭世子忽復歸于鄭故鄭伯突入于櫟以逼之程子曰突非正也忽既恣行故國

人君之諸侯助之書爵所以戒居正者已不能保則人取之矣書入以見義不容也葉氏夢得曰突何

以名疾之也因櫟人殺其大夫檀伯而竊居之以是而求復國雖曰盜可也張氏洽曰春秋止書突入

櫟而忽亶儀之事皆不書者所以見大都耦國既入於此則鄭國之命已制於突與入其國都蓋無以異

特書入于櫟而略其入國亦所以謹亂之所由生也
又以見忽亶儀之為君者末矣而不足紀此春秋所
以為簡嚴之書也 趙氏鵬飛曰諸侯奔而復入不
至於國者唯此鄭突入櫟與襄二十五年衛侯入夷
儀而已然鄭伯突名而衛侯不名衛侯衍書復歸于
衛而鄭伯突不書歸于鄭此正不正之辨也衛侯之
出國固其國也林父逐之而立剽不正也故衍入于
夷儀待剽之死而已非篡也故聖人不名以別之突
之出位固非其位宋立之也突入于櫟逼忽而出之
篡也故聖人名之以見其惡 李氏庶曰春秋謹強
都之害書突入櫟而不書其入鄭書晉滅下陽而不
書其滅虢責鄭之失虎牢予魯之墮費邱皆此意也
陳氏際泰曰下陽法不宜書滅而曰滅于櫟法不
宜書入而曰入下陽滅而虞已無事矣于櫟入而鄭
已無
事矣

冬十有一月公會宋公衛侯陳侯于袤伐鄭

宋公上公
有齊侯袤

昌氏反公作侈

袤杜注宋地沛國相

縣西南有袤亭今在江南鳳陽府宿州

左傳

會于袤謀伐鄭將納
厲公也弗克而還

胡傳

左氏曰將納厲公也穀梁曰地而後伐疑辭非
其疑也昭公與突之是非邪正亦明矣然昭公

雖正其才不足以君一國之人復歸于鄭日以微弱
厲公雖篡其智足以結四國之援既入于櫟日以盛
強諸侯不顧是非而計其強弱始疑於輔正終變而
與邪穀梁所謂非其疑者非其疑於為義而果於為
不義相與連兵動衆納篡國之公子也
故詳書其會地而後言伐以譏之也

集說

杜氏預曰先行會禮而後伐也
休以為征突非也蓋休不知之又曰穀梁曰地
劉氏敞曰何

而後伐疑詞也非其疑也非也此先會後伐耳亦何疑詞哉蘇氏轍曰地而後伐既會而後伐也穀梁

曰疑詞也非其疑也蓋以為伐突以正忽也夫突在櫟不在鄭伐鄭非伐突也乃所以救突也穀梁之妄

若是者衆矣

陳氏傅良曰納厲公也會伐會盟會

救會侵皆前定之詞也未前定則書會於某而後伐

會於某而後盟會於某而後救會於某而後侵前定

同欲也未前定繼事也呂氏大圭曰或疑宋既責

賂於突而伐鄭不當又納突遂謂伐突救忽然魯桓

方與突伐宋亦不當會宋伐突忽奔於衛而衮之會

則衛與焉突奔蔡而曹之會蔡與焉謂衛不應伐忽

以納突則蔡亦不應伐突以救忽春秋諸侯之離合

不常可勝辯哉但據經伐鄭二字則突在櫟忽在鄭

為伐忽明矣趙氏與權曰宋馮前年方以四國之

師伐突未幾突出忽歸又以三國

之師納突馮之無恒心可知矣

案公會諸侯兩伐鄭左氏以為納厲公是也注公羊者謂善諸侯征突不知忽方在鄭突尚居櫟安得以伐鄭為征突乎穀梁曰疑辭也夫會而後伐則謀已定矣尚何疑乎胡傳雖引用穀梁而亦主納突之說與左傳同

丁莊王十有六年齊襄二年晉緡九年衛惠四年蔡桓元年

六年陳莊四年杞靖八年宋莊十四年秦武二年楚武四十五年

春正月公會宋公蔡侯衛侯于曹

左傳會于曹謀伐鄭也

集說杜氏預曰前年冬謀納厲公不克故復更謀孫氏覺曰曹之會二傳無說惟左氏以為謀伐

鄭案左氏事迹凡此二年之間會盟侵伐皆為納厲
公突蓋突猶居櫟忽未出奔故諸侯謀伐忽而納之
爾張氏洽曰於此又邀蔡與同事黨益張矣湛
氏若水曰左氏曰謀伐鄭也愚謂非禮之會且為不
正况屢謀以伐人乎其肆
人欲滅天理罪孰大焉

夏四月公會宋公衛侯陳侯蔡侯伐鄭

左傳

夏伐鄭

胡傳 春正月會于曹蔡先於衛夏四月伐鄭衛先於蔡王制諸侯之爵次其後先固有秩序矣在周官大司馬設儀辨位以等邦國猶天建地設不可亂也及春秋時禮制既亡霸者以意之向背為升降諸國以勢之強弱相上下蔡嘗先衛今序陳下者先儒以為後至也以至之先後易其序是以利率人而不要

諸禮也豈所以定民志乎春秋防微杜漸尤嚴於名分考其所書意自見矣

集說

杜氏預曰蔡嘗在衛上今序陳下蓋後至孔氏穎達曰諸侯之序以大小為次自隱至莊十

四年四十三歲征伐盟會凡十六國時無霸主無有成序其間蔡與衛凡七會六在衛上惟此處在陳下故以為蓋後至也 劉氏敞曰傳曰伐鄭以納突也伐鄭以納突則何以不曰納鄭伯於鄭不與納也何為不與納諸侯失國諸侯納之正也納突非正也又曰案傳例與謀曰及不與謀曰會此稱公會則不與謀者也而正月會于曹傳云謀伐鄭乃是與謀與謀而稱會何耶杜云魯諱納不正非也如魯人自知其罪而諱避不言此固春秋所當正也何故緣其不肖之意與之比周揜匿耶且魯人惟不知義故伐鄭豈復稍避與謀之名哉 程子曰突善結諸侯故皆為之致力屢伐鄭也 葉氏夢得曰此納突也鄭忽自

是不復見矣忽之弑與子亶子儀之弑終於突復立皆不見於經 王氏葆曰突之未出也宗欲有所責

故嘗伐之突之既出也宗懼無所得又欲納之始鄭不和魯嘗以鄭伐宋及突既出魯又與宗伐鄭反覆

皆私也 張氏洽曰自鄭突入國之後即比魯而讎

宋十二年之戰十四年之伐其怨深矣及其出奔乃

能使魯與宋自冬及夏悉力伐鄭所謂善結也衛侯朔與母構兄亦姦惡之雄今復因同惡之合陵蔡侯

而居其上春秋比事直書以見當時王政不行霸者未作小人恃其強衆凌暴寡弱如此及桓文之興而

後少抑焉春秋欲不與齊晉可得乎 呂氏大圭曰

會于曹蔡先衛伐鄭衛先蔡蓋當時諸侯皆以一切

強弱目前利害為先後不復用周班春秋因事紀實以見當時之亂無復禮也 家氏鉉翁曰自去冬及

今夏三書公會再書伐鄭不間以他事誅宋魯之輔篡而干正也 汪氏克寬曰蔡衛皆姬姓侯爵而或

先或後者率以私意為進退也故此年會曹先衛伐鄭先蔡而盟踐土會宋會召陵侵楚蔡又先衛會虢衛又先蔡紛更不一會鄭盟幽侵蔡會首止圍新城會鹹盟牡丘會淮盟新城會棊林盟蜀襄五年會戚會鄆則陳先於衛從王伐鄭宋以四國伐鄭會于袤此年伐鄭會宋會虢會召陵則衛先於陳此年伐鄭伐衛納朔次郎會北杏盟齊會孟圍宋盟翟泉會虢則以陳先蔡從王伐鄭宋以四國伐鄭會溫襄二十四年伐鄭會宋會申再伐吳會召陵敗雞父則又以蔡先陳是皆先後之無常無非霸者以意之向背為升降也又其甚者許以男而先曹伯淮之會則又先邢侯莒邾以子而先薛伯杞伯矣齊桓以侯而先宋公則曰主盟也然自晉霸後齊亦以侯而先宋公矣齊世子光盟雞澤至會桓皆序小邾子之下世子未誓以皮帛繼子男似也然伐鄭成虎牢之役則序滕子薛伯杞伯之

上亳城北蕭魚之役則序莒邾之上據傳於成虎牢之役謂齊太子光宋向戌先至於鄭門於東門則亦以至於齊太子光宋向戌先至於鄭門於東門則亦以至於先後易其序耳春秋之時王政不綱典禮廢壞滕薛朝魯而爭長魯以周班後鄭而有郎之戰馴至季世宋虢之會楚爭晉先春秋之終吳且爭長於黃池而主會矣然春秋於諸侯爵次之紊亂從主會者之所為而不草者所以彰其失也宋虢先晉黃池以兩霸言之所以抑其強也宋虢黃池待貶絕以見罪惡其餘從主會者之所為不待貶絕以見罪惡

秋七月公至自伐鄭

此致伐之始

左傳

秋七月公至自伐鄭以飲至之禮也

集說

孫氏覺曰案書至義與二年公至自唐同說皆告廟則書也彼書地此書伐鄭蓋非魯地者皆

志以事也 程子曰不惟告廟又以見勤勞於鄭突也 家氏鉉翁曰自去年十一月會而伐今年正月

又會四月又伐歷三時之久乃歸暴師一年為是逆理悖常之事桓之惡亦稔矣已篡弒未討前既會諸

侯于稷以成宋之亂此復合三國以輔鄭突之篡謂天下無王而敢為此也物極必復天討將加濼之禍

且將作矣 吳氏澂曰公至常事書者皆譏也 李氏庶曰經書公至自伐十二而至自伐鄭者五除此

役外餘皆 伯事也

冬城向 向失 亮反

左傳 書時 也

集說 杜氏預曰傳曰書時也而下有十一月舊說因謂傳誤此城向亦俱是十一月但本事異各隨

本而書之耳又推校此年閏在六月則月却而節前
水星可在十一月而正也 孔氏穎達曰十一月水

星昏猶未正故復推校歷數此年月却節前水星可
在十一月而正又方者未至之辭故以定之方中為

方欲向中而實未正中十一月可以興土功書時非
傳誤也 啖氏助曰下有十一月則此乃十月也縱

是同月亦今之九月農功未畢不可興役 張氏洽
曰下有十一月即夏正九月不時也 趙氏鵬飛曰

向介莒魯之境上本非莒邑故莒魯交爭互以為己
有而其交爭自今日城向始故聖人謹志之 趙氏

與權曰鄭之伐既疲民於鋒鏑向之城復役民於畚
鍤終歲勤動民不得休息 汪氏克寬曰凡書城未

有繫月者蓋城築之事非可月成也然周之十月十
一月皆農收之時蓋戒事於冬而以春正月畢功則

無妨農
之病矣

案劉氏炫歷引周語之文謂火見土功必在建亥之月則建戌之中必無土功之理故啖氏助張氏洽皆以為不時其說是也杜氏預謂此年閏在六月則月却節前孔氏穎達暢發其義以明非傳之誤似亦有理

十有一月衛侯朔出奔齊

左傳

初衛宣公烝於夷姜生急子屬諸右公子為之娶於齊而美公取之生壽及朔屬壽於左公子

夷姜縊宣姜與公子朔構急子公使諸齊使盜待諸莘將殺之壽子告之使之行不可曰棄父之命惡用子矣有無父之國則可也及行飲以酒壽子載其旌以先盜殺之急子至曰我之求也此何罪請殺我乎又殺之二公子故怨惠公十一月左公子洩右公子職立公子黔牟惠公奔齊

莘杜注衛地陽平縣西北有莘亭今山東東昌府莘縣北莘亭故城是也

公羊

衛侯朔何以名絕曷為絕之得罪於天子也其得罪於天子奈何見使守衛朔而不能使衛小

衆越在岱陰齊屬負茲舍不即罪耳

穀梁

朔之名惡也天子名而不往也

集說

杜氏預曰惠公也朔讒構取國故不言二公子逐罪之也劉氏敞曰朔何以名奔而名者見

有君也孰君公子黔牟也

陳氏傅良曰此衛人立

公子黔牟而後奔則其但書奔何以為自失國也春

秋之法苟其道足以失國雖有篡公子亦以自致之文書之是故衛人立黔牟而朔出蔡人立東國而朱

出邴人立君而朱儒出書奔而已矣家氏鉉翁曰

朔譖殺其兄而居其處因以有國左公子洩右公子

職因衆怒逐之而立黜牟春秋不書所逐之人以朔
殺兄篡國罪固當逐是以名以奔之蓋討之也而天
王命子突救黜牟則知朔以有罪見黜於王而黜牟
之立王實命之則黜牟不得謂之篡而朔非君矣
張氏洽曰朔立已五年二公子不能獨逐之必因其
陵蔑天子周室欲討而後二子得以行其志所以莊
六年王人子突救衛公羊氏之說其必有所傳矣朔
殺兄奪國王命絕之故名 王氏元杰曰衛朔以庶
孽兆釁陷兄於死罪莫大焉國君乃社稷人民之主
而見逼逐失君道矣經書出奔其罪不待貶絕而義
自見
矣

案衛朔之奔左氏以為二公子所逐公穀以為得罪
天子張氏洽兼而用之謂王室欲討而後二子得行
其志於情事甚
合當主其說

丙莊王十有七年齊襄三年晉緡十年衛惠五年黔牟元年蔡桓二十年鄭厲六年昭二年

曹莊七年陳莊五年杞靖九年宋莊十五年秦武三年楚武四十六年

春正月丙辰公會齊侯紀侯盟于黃

黃杜注齊地路史登州黃縣東南有

古黃城本紀邑後入齊案登州府黃縣齊東垂也去魯殊遠疑非會盟處

左傳

平齊紀且謀衛故也

集說

高氏閔曰紀懼齊之見圖每為之備而齊人多詐故為此盟示之以不疑俾之弛怠而不我慮

是以尋盟既退魯遂與齊戰于奚二年齊遂遷紀之三邑足以知盟之無益而攻伐隨之矣張氏洽曰

公十三年會紀侯敗齊以益其怨今乃盟之豈足以釋憾又欲納朔一動而二失也黃氏震曰為紀平

齊也齊之圖紀於是十有二年矣魯為紀納后於王故紀雖從魯鄭敗齊而齊僖不敢報怨齊僖畏義也僖公卒而襄公立春與魯盟于黃夏與魯戰于奚齊且無魯豈為魯存紀故紀卒為齊所滅汪氏克寬曰紀魯之姻國而衛朔在齊故齊欲納朔而魯欲平紀也然二年之後齊遽遷紀三邑六年之後魯卒會齊納朔則非特紀之削弱盟不足恃而齊魯之強弱亦具見矣

二月丙午公會邾儀父盟于趯

會公穀作及趯翠軌反
趯杜注魯地當在今

兗州府泗水

鄒縣之間

左傳

及邾儀父盟于
趯尋蔑之盟也

集說

杜氏預曰二月無丙午丙午三月四日也日月
必有誤孫氏覺曰及內為志會外為志儀父

附庸之君非敢盟公公欲與之盟耳此當以公穀及字為定高氏閔曰趙我地彼來而我及之也與蔑

之盟同邾來為此盟豈非諸侯有謀邾者欲求魯之援耶家氏鉉翁曰隱公立之始年即為蔑之盟桓

公十有七年始為是盟蓋篡國之君儀父惡而遠之八年為魯所伐十五年乃與牟葛俱朝至是始會而

盟猶曰尋蔑之盟儀父之不苟有所附可見吳氏澂曰隱公元年及邾盟蔑七年而隱公渝盟伐邾桓

公八年又伐邾魯邾不通好十有餘年至桓十五年邾同年葛朝魯既朝之後二國欲尋蔑盟而平其再

伐之怨故邾來魯地受盟而公與之盟也汪氏克寬曰下書伐邾則趙盟不待貶而惡自見矣隱桓皆

盟邾而背盟皆以宋故以國君之重而其心無所適主尚足貴乎

夏五月丙午及齊師戰于奚

公闕夏字奚穀作郎此齊魯交兵之始奚杜注

魯地今兗州府滕縣南奚公山下有奚邑水
經注夏車正奚仲之國也山上有奚仲冢

左傳夏及齊師戰于奚疆事也於是齊人侵魯疆疆
吏來告公曰疆場之事慎守其一而備其不虞

姑盡所備焉事至
而戰又何謂焉

穀梁內諱敗舉其可道者也不言其人
以吾敗也不言及之者為內諱也

集說杜氏預曰齊背盟而來公以信待故不書侵伐
皆陳曰戰高氏閔曰不書敗蓋魯敗也趙

氏鵬飛曰前日為黃之盟齊蓋不欲魯必有以強之
故春盟而夏有是戰焉何以不書伐不與齊之背盟
而來伐我也家氏鉉翁曰今年春魯及齊紀會盟
于黃曾幾何日遽戰于此齊無信也魯桓自齊僖存
時為紀有求及襄之立繼申前請遂為黃之會盟
襄不惟不從乃遽以兵加於魯襄之慢魯甚矣

六月丁丑蔡侯封人卒

左傳

蔡桓侯卒

秋八月蔡季自陳歸于蔡

左傳

蔡人召蔡季於陳秋蔡季自陳歸于蔡

穀梁

蔡季蔡之貴者也自陳陳有奉焉爾

胡傳

季字也歸順辭蔡季之去以道而去者也其歸以禮而歸者也公子不去國季何以去權也既

歸何以不有國獻舞立矣若季者劉敵所謂智足以與權而不亂力足以得國而不居遠而不攜邇而不

迫者也是以見貴於春秋

集說

何氏休曰稱字者蔡侯封人無子季次當立封人欲立獻舞而疾害季季辟之陳封人死歸反

奔喪思慕三年卒無怨心故賢而字之

陸氏淳曰

啖氏云蔡季者蔡侯之弟也歸而合義故字之言當

時自外而入者或有謀殺或有奪正或本非當立或國人不順無如蔡季之美者故褒而字之所謂君子

義而後取者也許叔非國人所逆故不得同此例

孫氏復曰蔡季言自陳歸于蔡者桓侯卒蔡季當立

時多篡奪明季無惡故曰歸于蔡所以與許叔異也

劉氏敞曰蔡季何以稱字賢也何賢爾其去也以

道其反也以禮公子不去國何賢乎季之去權也其

言自陳何陳有力焉爾又曰左氏曰蔡人嘉之也案

此蔡人嘉之則必蔡人逆之矣葉氏夢得曰春秋

大夫言自而歸者二宋華元自晉歸于宋衛孫林父

自晉歸于衛是也公子言自而歸者二陳侯之弟黃

自楚歸于陳楚公子比自晉歸于楚是也然其先必

見奔故華元書出奔孫林父書出奔黃書出奔比書
出奔惟蔡季見歸不見奔夫奔之為言惡也皆非以
道去其國者魯公子友書季子來歸而不見奔魯公
子之奔未有不書於策者也蓋以非其罪有不得已
而出故君子特變其文曰季子來歸志魯人之喜也
蔡季處於封人獻舞之間亦難乎其免矣公子無去
國之道而不出不言奔其還則蔡人召之進退必有類
於魯友歟何休之言略與左氏合雖無所經見而有
近乎春秋也 張氏洽曰復國於危疑之際考之書
法惟蔡季為善以其潔身而去一無爭心念念宗國
聞召即歸能遠禍於未然不悻悻以為高其去就合
宜故春秋貴之 呂氏大圭曰突歸于鄭則名之赤
歸于曹則名之以其爭國也蔡季歸于蔡則不名以
其非爭國也言其終不為君也 家氏鉉翁曰諸儒
多從公羊之說謂字而歸之褒之也獻舞失國之君
蔡季讓國之賢春秋二人賢否具見書法而左氏乃

謂季獻舞為一人愚竊惑焉 李氏庶曰春秋兄弟之歸者惟蔡季與季子或稱字或稱子美之也非若陳黃楚比之書名者比矣書大夫之自某而歸者蔡季之自陳非若元咺孫林父公孟彊之假力於晉齊者比矣又曰兄弟之取貴於春秋者惟許叔之復蔡季之歸紀季之去叔胗之不仕與夫季子之來歸而已皆書字以貴之衛鱣雖有合於春秋而不得同於書字之例者主於書弟以罪衛侯而鱣亦無可美也案蔡季非獻舞杜氏預誤合為一人耳左氏止曰召蔡季於陳蔡季自陳歸于蔡而已未嘗謂立以為君也先儒並主何氏之說而家氏鉉翁斷以書法尤為可信

癸巳葬蔡桓侯

胡傳 啖助曰蔡桓何以稱侯蓋蔡季之賢知請謚也或曰蔡未有不稱公者其稱侯傳失之耳臣子

之於君極其尊而稱之禮也其說誤矣孔子疾子路使門人為臣子曰無臣而為有臣吾誰欺欺天乎曾子疾草而易簣曰吾得正而斃焉斯已矣故終而必安於正人子不以非所得而加之於父是為孝人臣不以非所得而加之於君是為忠極其尊而稱之不正之大者而可以為禮哉或曰魯君生而稱公亦非禮乎曰生而稱公為虛位禮之文也沒而繫謚為定名禮之實也春秋諸侯雖伯子男葬皆稱公志其失禮之實為後世戒欲其以正終也其垂訓之義大矣

集說

啖氏助曰其稱侯蓋蔡季之賢請謚於王也此言凡諸侯請謚於王之策書則云謚曰某侯

諸國史因而紀之故西周諸侯記傳皆依本爵春秋之時則皆稱公夫子因而書之以明其不請於王也陸氏淳曰啖氏云五等諸侯本國臣子皆稱之曰公葬既不請王命因而私謚為公從而書之以見非

禮案史記世本左氏傳蔡之諸君皆謚為侯經則皆稱公者以其私謚與僭同也惟蔡桓稱侯蓋告王請謚故特書之明得禮也又曰侯伯子男之國稱其君曰公臣子之辭也謚不得云公者謚王所賜也 劉

氏敞曰葬者稱公此其稱爵何稱爵禮也稱公非禮也稱爵何以禮稱公何以非禮稱爵者誅之於天子者也稱公者非誅之於天子者也賤不誅貴幼不誅長生無爵者死無謚生有爵者死有謚孔子曰諸侯相誅非禮也又曰諸侯之國亦多矣莫能正死生之禮者桓侯之賢又未有聞於春秋吾以此效之桓侯非賢而蔡季請之可知矣人亦多愛其君者矣莫能愛其君以禮而蔡季行之此乃賢者之所以異於衆人也 胡氏銓曰生有黜陟沒有謚王者柄此以別臣下賢不肖而使人有勸懲也晉侯仇卒於平王之時謚曰文侯以謚加本爵足以知命於天子也是後周益衰諸侯沒者不復請謚於王五等一稱公乃臣

子之自謚 汪氏克寬曰近世仕於時者其親友僕隸皆以其未得官爵為稱謂暨其死也銘旌墓誌止稱所得官爵所謂生而稱者為虛位沒而稱者為定名也 邵氏寶曰何以知其謚於王侯王爵也爵王爵則謚王謚矣故私謚者則從其私稱

及宋人衛人伐邾

集說 陸氏淳曰左氏曰宋志也 趙氏曰據例稱及者皆內之志云宋志非也 孫氏覺曰邾前年來

朝又此年盟于趙今遽帥二國之人伐親附者所以見會盟無信強大縱橫而弱小見陵也 許氏翰曰

正月與齊為黃之盟而五月戰焉二月與邾為趙之盟而八月伐之詩曰君子屢盟亂是用長豈不然哉

張氏洽曰桓公春與齊邾盟既而皆背之戰奚伐邾並見於一年之中反顧前日刑牲詔神玉帛交錯

棄如敝屣蓋其為人瀆信而好亂不仁而佳兵人理
滅矣宜其不踰年見殺於齊也 陳氏深曰案左氏

雖魯從宋志此書及則亦魯之志也 湛氏若水曰
及者我及之也書及宋人衛人伐邾著魯桓反覆之

罪 季氏本曰衛為宋黨其從宋何尤焉魯方與邾
盟亦為宋所扳稱兵失信以大國而中無適主何以

使人任乎 卓氏爾康曰邾宋爭疆魯從宋志背趙
盟而伐邾故不書師不書人 張氏溥曰齊侵魯疆

背盟者齊邾宋爭疆啓兵者宋抑名爭從亂
誰則為之是故譏桓盟者甚於隱之盟蔑也

冬十月朔日有食之

集說 杜氏預曰甲乙者歷之紀也晦朔者日月之會
也日食不可以不存晦朔晦朔須甲乙而可推

故日食必以書朔日為例 趙氏匡曰左氏曰不書
日官失之非也或史官闕之或年深寫誤何闕日官

日御乎 陳氏傅良曰自文以上日食有不書日者
自文以下皆書日故曰桓莊之世多闕文 湛氏若
水曰紀異也不書
日史逸其傳耳

案書朔不書日趙氏匡陳氏傅良湛氏若水皆以為
闕蓋晦朔甲乙或書或不書者舊史有詳略而夫子
因之也劉氏敞楊氏時於隱三年辨之精矣再考歷
家論朔有平朔有定朔以日平行月平行推算某日
某時某刻合朔是為平朔日有盈縮月有遲疾取均
度或加或減於平行為某日某時某刻日月相會是
為定朔自劉洪乾象歷始用定朔於是非朔不食漢
初以前皆用平朔故有食於朔之前後者公羊所謂
失之前失之後穀梁所謂食晦日食既朔也但朔前
朔後聖人何難據實以書之而必各立義例乎日食
於朔二日則不得為朔矣而可仍
以朔書之乎故當以闕文為正

附錄左傳

初鄭伯將以高渠彌為卿昭公惡之固諫不聽昭公立懼其殺已也辛卯弑昭公而

立公子亶君子謂昭公知所惡矣公

子達曰高伯其為戮乎復惡已甚矣

丁莊王

十有八年

齊襄四年晉緡十一年衛惠六年黔亥三年

子亶元年曹莊八年陳莊六年杞靖十年宋莊十六年秦武四年楚武四十七年

春王正月

胡傳

是年桓公已終復書王者春秋之時諸侯放恣弑君篡國者已列於會則不復致討故魯宣殺

惡及視以取國賂齊請會而傳曰會于平州以定公位曹伯負芻殺太子自立見執於晉而曹人請之曰若為有罪則君列諸會矣孔子為此懼作春秋於十八年復書王者明弑君之賊雖身已沒而王法不得

赦也又據桓十五年天王崩至是新君嗣立三年之喪畢矣明弑君之賊雖在前朝而古今之惡一也然則篡弑者不容於天地之間身無存沒時無古今皆得討而不赦聖人之法嚴矣已列於會則不致討可乎故曰春秋成而亂臣賊子懼

集說

范氏甯曰此年書王以王法終治桓之事

孫

氏復曰桓無王元年二年十年十八年書王者春秋之法王無十年不書也十年無王則人道絕矣是故二百四十二年王無十年不書者也

孫氏覺

曰正月有王桓公之終也弑君之賊無可赦之理不見誅於一時當見誅於歲月不見誅於其生當見誅於其死不見誅於終身當見誅於萬世家氏鉉翁曰魯桓弑兄篡國十有八年天王不能討因而善之彼亦忘其為篡久矣孰知亂自內作送死疆鄰以迄天誅春秋於是年復書王正月以正篡賊之罪而垂

法於後世汪氏克寬曰此年正月書王誅桓公之
終身無王也弒君之賊身無存沒時無古今皆得討
而不赦故漢之王莽弒平帝魏之司馬昭弒高貴鄉
公唐之韋后弒中宗之類前史皆隱其迹而朱子於
通鑑綱目必正其大惡之名使其罪暴白於萬世豈
非取春秋之義歟趙氏訪曰桓無王其曰王何也
既謹其始必正其終也

公會齊侯于濼

濼盧篤反又音洛 濼水杜注在濟南府歷城縣西北入濟今趵突泉即濼水

之源也蓋濟水伏流重發處

公與夫人姜氏遂如齊

公無與字

左傳

公將有行遂與姜氏如齊申繻曰女有家男有室無相瀆也謂之有禮易此必敗公會齊侯于

樂遂及文姜如齊
齊侯通焉公謫之以告

公羊

公何以不言及夫人
夫人外也夫人外者何內辭也其實夫人外公也

穀梁

樂之會不言及夫人何也
以夫人之仇弗稱數也

胡傳

與者許可之辭曰與者罪在公也為亂者文姜
而春秋罪桓公治其本也易曰夫夫婦婦而家

道正夫不夫則婦不婦矣乾者夫道也以乘御為才
坤者婦道也以順承為事易著於乾坤述其理春秋
施於桓公
見其用

集說

杜氏預曰公本與夫人俱至樂公與齊侯行會
禮故先書會樂既會而相隨至齊故曰遂孔

氏穎達曰僖十一年公及夫人會齊侯于陽穀彼言
及此不言及者傳載申繻之言譏公男女相瀆蓋以

相褻瀆之故果致大禍時史譏其男女無別故不書及也 范氏甯曰實驕伉而不制故不言及 陸氏

淳曰淳聞於師曰婦人之義從夫者也何夫人之伉譏公失為夫之道自致其禍 劉氏敞曰不言及而

言與猶匹夫匹婦之相與云爾自禍之道也 蘇氏轍曰非禮也 濼之會公實與姜氏行其不言公與夫

人姜氏會齊侯于濼夫人不會也其不言及何也及上下之詞也與不相屬也所以惡夫人也 程子曰

人雖不能無欲然當有以制之無以制之而惟欲之從則人道廢而入於禽獸矣 葉氏夢得曰夫人不

婦而後欲為會強公以適齊公不夫而後不能制夫人與之如齊以成其意故不言及言與以繼事之辭

見也 趙氏鵬飛曰如齊者文姜志也非公意也故不書及而書與若曰公不得已而與姜氏如齊也

呂氏大圭曰古人制禮尺寸不敢踰毫髮不敢越者也夫豈強拂人之性情而以繁文末節為尚哉經國

家定禍亂而杜未然也泉水載衛女思歸而不可得
載馳載戴許穆夫人欲歸唁其兄而義不可夫人之適
其國父母在則有歸寧既終則大夫行聘問而已古
人之制禮也嚴矣違此者未有不敗公之與夫人如
齊是夫而不能夫也夫者以智帥人者也智不足以
帥人而可謂之夫乎 吳氏澄曰此行公往會齊侯
爾夫人欲同往公不能制灤會禮畢夫人又欲從齊
侯至齊夫婦既同出公不可獨反國故遂與之同如
齊也 汪氏克寬曰與之為言乃黨與匹敵之義而
不相屬之辭也故以尊及卑曰及以此及彼曰及皆
及者為主僖公及夫人姜氏會齊侯于陽穀以公及
夫人夫人不敢專行也桓公與夫人姜氏如齊若曰
夫人專行而公從之也易曰夫子制義從婦凶也桓
公不能制義而從文姜以往其咎可知矣春秋以一
字為褒貶
豈不信哉

夏四月丙子公薨于齊丁酉公之喪至自齊

左傳

夏四月丙子享公使公子彭生乘公公薨於車魯人告於齊曰寡君畏君之威不敢寧居來脩

舊好禮成而不反無所歸咎惡於諸侯請以彭生除之齊人殺彭生

穀梁

其地於外也薨稱公舉上也

胡傳

魯公弒而薨者則以不地見其弒今書桓公薨于齊豈不沒其實乎前書公與夫人姜氏如齊

後書夫人孫于齊去其姓氏而

莊公不書即位則其實亦明矣

集說

范氏甯曰夫人與齊謀殺之不書諱也 趙氏 匡曰在外薨不以有故無故皆當書其地 石

氏介曰其以喪至痛之也 蘇氏轍曰公薨不地故也此其言齊何也在外不可不言也 朱子曰孔子

直書義在其中云公會齊侯于某公與夫人姜氏如齊公薨于齊公之喪至自齊夫人孫于齊此等顯然在目雖無傳亦可曉高氏閔曰桓弒立不免見殺於人天理亦不借矣春秋不以討賊書者齊襄殺之非討弒隱之罪也濼之會不書夫人出以遂如齊見之喪至不書夫人入以孫于齊見之不與其出不與其入聖人之意微矣張氏洽曰魯君見弒有二在內則不書地以存其實在外則不容不書其地而以上下文見之此先書公與夫人姜氏如齊而明年書夫人孫于齊又莊公不書即位雖不明書齊人戕公而桓公之不得其死已昭然矣蓋本國之事書之與他國同則非所以見尊君親上之意是以桓公見殺不得不諱又當不沒其實以示後世之傳信故曰婉而成章也家氏鉉翁曰齊魯雖婚姻之國盟會未幾戰爭相尋蓋敵國也公一旦與姜氏如齊殆天所以致篡逆之誅非人所能為也程氏端學曰魯軌

篡弑天子不征諸侯不討魯人戴之為君彼自恃其無誰何也於是黨亂賊凌小國背盟結怨黷武殘民不奔王喪怠忽宗祀成亂取賂儼朝同列身既不正家遂莫齊卒殄於淫婦之禍夫姜氏諸兒之惡不待言而著矣然自作孽者幸免王誅難違乎天矣春秋比書十八年之事而終之以此有以為永鑒哉

金

氏賢曰陳佗弑逆之賊也如蔡蔡人以私殺之春秋以討賊之義與蔡以當討之賊名佗書曰蔡人殺陳佗桓亦弑逆之賊也如齊齊人亦以私殺之春秋以惡佗之例惡桓可也乃不以討賊之義予齊不以當討之賊名桓而書公薨于齊者臣子之詞也然桓見弑而書地賊未討而書葬聖人之情亦可見矣

秋七月

附錄左傳

秋齊侯師於首止子亶會之高渠彌相七月戊戌齊人殺子亶而轅高渠彌祭仲逆

鄭子於陳而立之是行也祭仲知之故稱疾不往人曰祭仲以知免仲曰信也周公欲弑莊公而立王子克辛伯告王遂與王殺周公黑肩王子克奔燕初子儀有寵於桓王桓王屬諸周公辛伯諫曰竝后匹嫡兩政耦國亂之本也周公弗從故及

首止杜注衛地陳留襄邑縣東南有首鄉今河南歸德府睢州即襄邑也首鄉在州東南

冬十有二月己丑葬我君桓公

公羊 賊未討何以書葬 讎在外也 讎在外則何以書葬 君子辭也

穀梁 葬我君接上下也君弑賊不討不書葬此其言 葬何也不責踰國而討於是也桓公葬而後舉

謚謚所以成德也 於卒事乎加之矣

胡傳

公羊曰賊未討何以書葬讎在外也穀梁子曰讎在外者不責踰國而討於是也夫桓公之讎

在齊則外也隱公之讎在魯則內也在外者不責其踰國固有任之者矣在內者討於是此春秋之法也

故十八年書王而桓公書

葬惟可以權者其知之矣

集說

范氏甯曰禮君父之讎不共戴天而曰不責踰國而討於是者時齊强大非已所討君子即而

恕之以申臣子之恩謚者行之迹所以表德人之終卒事畢於葬故於葬定稱號也昔周公制謚法大行受大名小行受小名所以勸善而懲惡陸氏淳曰賊在異國故可葬孫氏復曰桓謚也其曰葬我君

桓公者此臣子自謚以公禮而葬也

張氏洽曰葬

稱我君而後舉謚趙氏以為臣子之敬詞蓋明言我

君以舉其新加之謚然後其詞恭且順不然則恐涉他國君而近於不敬矣李氏廉曰桓公在位十有

八年首亂兄弟之倫而天理隳終瀆夫婦之倫而人
理喪魯國亂臣賊子之禍接跡於史冊實始於此然
其為人往往亦不義而得衆故即位之一年棄許田
以結鄭而有垂越之成二年因宋賂以立晉而有于
稷之會三年假姻好以協齊而有羸之會謹之會弟
年之來矣及其得志天王屢聘遠國屢朝於是宋之
戰紀之戰伐邾納突無所不至自以為莫已害矣孰
知禍起於帷薄哉此蓋天理之應也 汪氏克寬曰

春秋君弒而書葬者有九衛桓齊襄陳靈則賊已討
者也鄭僖齊悼則經不書弒者也蔡景之葬偏刺天
下之諸侯也許悼之葬不使止為弒父也蔡靈讎在
外而亦弒逆之賊與魯桓同楚虔之殞於比亦猶齊
諸兒之殞於無知也蔡昭讎在內賊已討而賊微不
書且以蔡昭背楚詐吳應受斃於盜賊也聖人之書
法如化工之生物無不適於天理之當然也 王氏
樵曰朱子發明君弒賊不討不書葬之義諸家所不

及然則在內不書葬者示臣子急於討賊之意讎在外書葬者勢或未可以遂討難於久暴露其親耳葬者權也必討者義也不討則義猶不葬也非許其可緩也陳氏際泰曰葬桓公君子辭也以恕待人之道也雖然薄乎云爾讎在外遂可以不報乎則春秋又何望莊公之深也

案劉氏敞曰君弑臣不討賊非臣子不復讎非子奈何以讎在外則勿復乎若以齊強魯弱量力不討君子不責是復讎者行於柔弱而困於強禦也與公穀不同而揆以不共戴天之義則其說未可廢故附見此於

欽定春秋傳說彙纂卷六



覆校官檢討臣李學錦
校對官檢討臣陳夢元
謄錄監生臣何廷宰